

**KA TAWANG**

**BAD**

**KA THMA CHINA INDIA**

**HA**

**KAMENG - 1962**



**Webster Davies Jyrwa.**

Accession No. 2728/12

Call No.

Author Jyoti K S

Title Ka Thame Chura Bala

Year 1962

Acc. No. 2728/12

**STATE CENTRAL LIBRARY**  
**GOVERNMENT OF MEGHALAYA**  
**SHILLONG**


1. Books may be retained for a period not exceeding 15 days by members.
2. Books may be renewed on request at the discretion of the Librarian.
3. Dog-earing the pages of a book marking or writing therein with ink or pencil, tearing or taking out its pages or otherwise damaging it, will constitute an injury to a book.
4. Any such injury to a book is a serious offence. Unless a borrower points out the injury at the time of borrowing the book, he shall be required to replace the book or pay its price.

**Help to keep the book fresh and clean**

CHECKED

State of Ohio  
State of Ohio  
State of Ohio





U NONGTHOH



# **KA KAMENG**

**BAD**

**Ka Thma China - India  
ha Kameng 1962**



**First Edition—1983.**

*All Rights Reserved*

**1983**





*WEBSTER DAVIES JYRWA*

**KA TAWANG**

*BAD*

**Ka Thma China - India  
ha Kameng-1962**



*LA PYNMIH DA U NONGTHOH.*



## SHIKYNTIEN

Ka jingitynnad jong ka shnong Tawang bad ki jaka sawdong ia ka—ki lum thah kiba jrong kiba kup da ka ior baroh shisnem lynter, ki diengkseh kiba wandur kum ka khoh, ki dieng 'tiewsaw kiba pynkup rong saw, rongstem, ronglieh ia ki khlaw bad ki lum ki wah, ki syntiew Kosmos kiba siang ia ki lyngkha bad ki surok kali, ka jinghap jong ka ior ha ki rukom bapher bapher kum ki syntiew dieng sohphoh, ki kynphad bad ki kuli lieh homeopathy ki kyrsiew ia nga ban shim ia u khulom bad thoh ia ka jingitynnad ka mariang ha kine ki jaka. Nga la thoh ruh katto katne shaphang ka Monastery kaba long ka Monastery kaba heh tam ha ki thain shatei lam mihngi ka ri India bad ia ki briew kiba shong ha kine ki jaka—ki Monpa kiba don ka jinglong kaba jai-jai bad kiba ngeit Blei, ka rukom im jongki, ka trei ka ktah bad ka jingiakhleh ha ka im lang sah lang jongki bad ki Tibetan kiba wan shong thap ha Tawang ha ka por ka jingphet shnong u Dalai Lama na Tibet.

Ka long ka jingshisha ba ia ka Tawang ynnym da la tip ia ka tad haduh ba ki China kin da wan hiar thma ia ka ri India bad dei ka Tawang ka ba la hap nyngkong eh ha ka kti ki China. Kumta nga la sngew dei ban thoh ruh khyndiat shaphang ka jingialeh ki shipai India pyrshah ia ki China ha kine ki phang ka Tawang. Nga la pynshong nongrim ia ka jingthoh jongnga na ki bun ki kot kiba la thoh da ki nongthoh bapher bapher bad na ka jingtip pateng jongnga na ki briew kiba shong ha kito ki jaka ryngkat ka jingioh leit jngoh jongnga dalade hi ia kiba bun ki phang jong ki jaka ialeh thma.

Nga pynpaw ka jingsngew burom ia i Bah  
 Ivan Simon iba la ai khyndiat ka lamkhmat ia ka-  
 ne ka kot bad ia ka Sorkar Jylla kaba iarap ban  
 pyndap ia ka jinglut kaba bun ha kaba shon ia  
 kane ka kot.

### K h u b l e i

*Dated Jaraw Langsning*  
*Shillong*  
*The 8th December 1983*

**Webster Davies Jyrwa**  
 Rtd. Senior Station Director  
 All India Radio  
 &  
 Rtd. Director, State Institute of  
 Art and Culture, Govt. of Meghalaya.

## KA 'TIEN-LAMPHRANG

Nga la pule ia ka jingthoh i Bah Web shaphang ka Tawang bad ki jingjia kiba jia ha ki thain jong ka la kumba arphew-snem ei-ei. Ki jingthoh jong i shaphang ka jaka bad ki briew ki ba shong ha kito ki thain ka pynkynmaw ia ngu ia kito ki por ha kiba nga ruh nga la poi sha Tawang bad ki la ktik ia ka jingangnud jong nga ba'n iohi biang ia ki. Don shibun ki jingitynnad ha ka ri ki Monpa: ym tang ka jingitynnat ka jinglong ki briew hynrei ka jingitynnat ruh ha ki lum ki wah; ka jingkynjah ha ki kynjang-lum kiba ngi ju ia-iaid bad ha kawei pat ka liang ka jingriewspah ki khlaw ki btap ha ki sim bad ki mrad-khlaw kaba pynpalei ia ka jingmut-jingpyrkhat jong ki nongleit jingleit sha kito ki jaka. Ka lingmane-bah ki Buddhist ha Tawang ka long da shisha kaba iphieng, bad u Verrier Elwin u ba ju long u Adviser on Tribal Affairs ha ka Sorkar NEFA haba u la poi hangto ha ki snem 1954 ei-ei u iathuh ba ka jingjar-jar hapoh ki jingkerkynroh sawdong bad ka jingsumar leh burom ki Lama ia ki kot ha ka Library ki pynkynmaw ia u ia ka University ha Oxford, bad u la pynbud ia ki jingong jong uwei u parari u ba la shem kiba syriem ki jingshem: If there is a heaven on earth, it is here, it is here, it is here !

Kaba kham bun na ka jingthoh i Bah Web ka dei shaphang ki jingialeh kiba la sar ia kine ki lum ha ka snem 1962. Nga phla ba nga'm shym pat pule lut ia ki kot ki ba i la pule shaphang kine ki jingjia bad nga'm sngew ba nga lah ba'n kynthoh ei-ei halor jong ki. Hynrei nga lah ba'n ong ba i la pule bun na ki bad ba i la pyrshang

ba'n pyni ia ki jingjia baroh ha ka jingthewtara-  
 jur ka bymnohshilliang. Ki nongpule ki'n ioh.  
 shibun kiei-kiei ki ba'n pynmyntoi na ki jingpule  
 jong ki ia kane ka kot.

Nga ai khublei ia i Bah Web na ka bynta ka-  
 ne ka jingpyrshang jong i. Nga kyrmen ba u  
 khulom jong i u'n ym thait.

*Maulai Umjaru*  
*Shillong-8*  
 5. 12. 83

**I. M. Simon**

## KA TAWANG

Ha ka jaka kaba kyndong tam jong ka Jylla NEFA lane ka ARUNACHAL, shaphang sepngi, ha ki padun jong ki kjat ki lumbah Maka-shang ne u budlum Thangla. hangne ki shong ki Monpa ha ka shnong Tawang.

Tawang ka mut ka jaka ha kaba la set ia ki kulai. 'Ta' ka mut 'kulai' bad 'Wang' ka mut ka 'thliew' ne ka 'lhuh'. Don pat kiba ong ba ia kane ka ktien la ioh ha ka por ba u Tertung Pema Lingpe u wan peit ia kane ka jaka na Tibet. Namar ba u la dei ban hiar na u kulai (Ta) ban kyrkhu ia ki briew (ong), ia kane ka jaka la khot Taong lane Tawang.

Ia ka shnong Tawang la ker da ka Bhutan na shaphang sepngi bad da ka Tibet ne China shaphang shatei. Kine laitylli ki ri ki iabyrshem ha ka jaka kaba khot ka Dhola kaba yn sa kham batai bha hadien. U pud ka ri India bad China u long tang kumba 10 kilometre ei ei na Tawang lada ring da u lain ne kumba her ka tyngab.

Ka shnong Tawang ka long kaba rit bad ym don ba tip shaphang jong ka. Dei ha u bnaí October ka snem 1962 ba ka Tawang ka la paw ha ka map India namar ha kane ka snem ka China ka la hiar thma ia ka India na ki khappud Tibet bad dei kane ka shnong Tawang kaba la hap nyngkong eh ha ka kti ki China. Ka History ka iathuh ruh ba u Dalai Lama bad ki kynhun nongbud jong u ki la phet na ka jingleit

buhai hima ki China ia ka Tibet ha ka snem 1950 lyngba ka Tawang. Kane hi ka pynpaw ba la don ka jingialeit iawan hapdeng ki briew kiba shong ha Tawang bad ki nong Tibet. Ka jingdon jong ka Monastery ne ka ingniam Buddhist ha kaba bun na ki 'riewniam kiba shong ha ka, ha ki snem kiba mynshuwa, ki long na Tibet, ka pynpaw ia ka jingiajan ki trai shnong Tawang bad ki nong Tibet. Hynrei katha ka paw na ki jingthoh, ki rukom im bad rukom pyrkhat ki briew pat ki iapher.

Ka Monastery ka long kum kawei ka shnong ba la tei da ki maw bad ba la ker baroh sawdong, syriem ia ka kut. Hangne ki shong haduh kumba laispah sanphew ki Lama ne ki 'riewniam kiba la aiti ialude na ka bynta ka niam Buddhist, kiba ngi lah ban ong, ki Lyngdoh. La seng ia kane ka ing Buddhist ne Manastery da u Mera Lama ha ka snem 1680 bad ka long ka ing mane kaba heh tam bad kaba rim tam ha ki thain shathie mihngi ka Asia. Ia ka shnong bad ki thain ba iajan baroh sawdong la ai da ka kyrteng Tawang. Ka Tawang ka dei ruh ka Headquarter jong ka Tawang Subdivision, hapoh ka District Kameng jong ka Arunachal kaba ngi ju tip kum ka NEFA. Haduh ka snem 1976, u Lyngdoh rangbah uba ki khot Rhimpoji, u dei na Tibet bad ha kine ki snem kiba hadien ki la don bun ki Lyngdoh traishnong. Kine ki Lyngdoh ki shong ki sah, ia trei iaktah hapoh kane ka Manastery ha la ki jong ki jong ki ing. Ha kawei na ki ingbah u don u statue ne jingoh dur ia u Buddha ba la



oh ne shna da ka khyndew da ki nongohdur  
 batbit na Lhasa bun bun snem mynshuwa. Ka  
 jingjrong jong une u statue ka long haduh kumba  
 sawphew phut. Ha kawei pat ka kamra ka don  
 ka Library ba kaba labuh bad sumar ia ki jing-  
 thoh ba iadei ia ka niam Buddhist ba la kyllaiñ  
 bad sumar bha. Don na kine ki jingthoh kiba la  
 thoh da ka ksiar. Ha ka kamra ba ha tbian jong  
 ka ingbah ki pynlong ia ka jaka mane ha kaba  
 ki Lyngdoh ki iashong na la ka jong ka jong ka  
 jaka ha ki kynja kushon barben bad ki ia pule  
 ia ki kot niam ki da buh bad ka kynja baje ba  
 ki tied mian, man la ka por. Ha ka kamra ba  
 haneng ki Lyngdoh ki ju put man ka step, ia ki  
 turoi kiba jrong haduh shiphew ne kahdar phut  
 ryngkat bad ki turoi kiba lyngkot bad ki ksing  
 kiba pyllun ba la buh bad u dieng kum u jingbat.  
 Lah ban iohsngew ia kine ki jingput bad ia ki  
 jingduwai na kane ka monasteri naduh na jngai.  
 Hapdeng kane ka Monastery, ba la ker tawiar  
 da ki ingmaw ba armala, ka don ka madan ba  
 la siang da ki maw wah bad hapdeng kane ka  
 madan u don u rishot bah, uba heh bad uba  
 jrong. Hangne ki ju pynlong ia ki jingshad lyng-  
 khuh snem kiba iadei bad ka rukom im bad ka  
 niam ki Buddhist sha kito ki thaiñ. Ryngkat  
 bad kine ki jingshad ki pynlong ruh ia ki mela  
 ne iew ha kaba ki briew ki lah ban ialeh sngew-  
 bha. Kum ha kine ki por, ki pynieng ia ka shan-  
 duwa ne ka ing jaiñ, sawdong ia une u rishot  
 bah. Ha kitei ki ingbah harud kane ka Madan,  
 ha ka mala kaba ar, ki buh ki jaka shong peitkai  
 ia kito ki 'riewdonburom.

Ka Tawang Monasteri ka ieng kum ka pdeng ki rukom im rukom pyrkhat ki briew shato bad ka jinglong mynsiem jong ki. Ha ki por balong ki jinglehniam leh rukom ki briew na kylleng sawdong, wat na ki thain Bhutan bad Tibet ki wan ban iadie iathied bad ialeh sngewbha. Kum ha kine ki por, ki rangbah ki phong ki Shnakut (coat) bad ki patlun saiwul shiteng khohwah ki-ba saw, bad ki kynthei pat ki phong ki jaiñ iong ba jynsur kaba long ka rukom riam ki kynthei Tibet bad Bhutan bad ki jaiñ teh ryndang ba bun rong Kine baroh ki pyniphuh iphieng bad pyni shongshit ia u lum baroh uwei. Ki kynthei Monpa ne ki trai shnong pat ki phong ki phrok ba thoh pynieng bad ki shnakut (coat) bad ki juti ba la shna da ki jaiñ barben bad kiba rem dor bha. Ki shet sa ki kynja mumo doh yak kiba bang bad u shaw. Kito kiba wan sha kine ki jinglehniam bad ki iew ki iabam kdang da kine bad ka sha ne ki jingdih bapher bapher.

Ha pajih khyndiat na katei ka Monasteri, kata ha uwei pat u syngit lum, ka don ka Monasteri kaba ric ha kaba ki shong ki riewniam Buddhist ne ki lyngdoh kynthei. Ka jaka kaba ki shong ka long ba khlieh ka riat bad ka long kaba shitom shibun ban leit shane.

Ka long kaei kaei kaba itynnad ba ha ki lumbah kiba jrong bad ha ki jaka kynjang lah ban iohi ia ki ing blei ne ki Mane jong ki Buddhist. Ha ki rud surok ne lynti bah ki don bun bha kum kine ki Mane bad ha kine ki buh ia ki kynja shaka dieng pyllun ba haba dei iaid lynti



U Nongthoh bad ka Miss Neeru Nanda IAS . Addl. D.C.  
K meng, U Rhimpojee (Head Monastery, Tawang) bad u  
tra shnong Tawang



najan ki briew ki pynshad ia ki bad ki duwai  
iaiaid artat.

Lyngba ki por, u briew u iaiwad ban pyn-  
dap ia kata kaei-kaei kaba u suda ha ka jingmut  
jingpyrkhat bad ka jingiadei jong u bad Uta uba  
la thaw ia u ne U Nongbuh-U Nongthaw ; Uta  
uba lah Uba iai bad kumta u pyrshang ban wad  
ki lad ban tei ia kane ka jingiadei lyngba kata  
kaba ngi ong ka Niam bad lyngba ka niam, u  
pan ia ka jingshai ka ban iarap ia u man ka ngi  
ha ka jingiaid jingieng bad ka jingim jong u na  
U Blei Nongbuh Nongthaw. Kumta wat ha  
kine ki jaka kyndong ha ka pyrtnei ne ki jaka  
kiba eh ban ialeit iawan, ki briew ki don la ka  
jong ka jingngeit ne ka niam. Ki ngeit ba ha ka-  
ne ka pyrtnei ki don ki mynsiem kiba bha bad  
kiba sniew kiba don ha ka haw-haw bad ba ki dei  
ban pyniasuk bad ki bad ban wad jingiarap na  
ki da kaba ai ki jingknia ainguh.

Ka long ka jingshisha ba ki dohlieh haba ki  
thoh shaphang ki briew sha kine ki thain mihngi,  
ki la iehnoh lane kim mon ban thoh ei-ei sha-  
phang ka jingngeit tynrai ne ia ka niam tynrai  
jong ki bad kumta haba ngi pule ia ki kot ba ki  
thoh, ngi shem ba ha kane ka liang ka don ka  
jingduna. Ki pyrshang pynban ban pynsugew-  
thuh ba ki riowlum sha kine ki thain shatei lam  
mihngi baroh kim don niam ban mane ia U Blei  
Nongbuh Nongthaw hynrei ki mane bleithaw  
bad ki ngeit bieit.

Ka Tawang ka long ka shnong kaba jar jar  
bad kaba la ker sawdong da ki lumbah ba ityn-

nad kiba phong da ka ior palat hynriew bnai ha ka shisnem, ki wahduid kiba tuid lyiur bad tlang bad ki laiphew jaid ki syntiew kiba phuh man la ka aiom bad ki diengkseh kiba beit bad wandur itynnad bha kiba bunjaid.

Na Tawang lah ban leit da ka kjat lyngba ki lynti muid haduh Bumla ka jaka kaba don ha u pud bad ka Tibet na shaphang shatei. Ban poi ha Bumla dei ban iaid lyngba ka jaka khim kaba ki khot ka Mila Pass. Ki shipai China kiba la wan hiar thma ia ka India ha ka snem 1962 ki la shna ia kane ka lynti ban pynpoi ia ki tiar ki tar bad ki jingdonkam ki shipai jongki da kaba siang da ki dieng tylli kiba heh bad kiba khelaiñ ban pyniaid ia ki kali jong ki. Na Tawang dei ban shu kiew lynter kata naduk shiphew hajar sanspah phut haduh khadhyñfiew hajar phut. Ka shim por haduh san kynta ia kito kiba khelaiñ ban iaid ban poi ha Bumla. Kumta ka jingjngai na Tawang ha Bumla kan long antad tad kumba khadsan kilometre. Ka Bumla kam shym jngai na Dhola ha ujuh u lumbah ha kaba ka jingialeh hagdeng ka China bad ka India ka la sdang nyingkong eh ha ka snem 1962. Ka long shisha kaba eh ban kiew sha kine ki jaka.

Ha u Rymphang arphew lai tarik jong ka snem 1974 nga la leit sha Bumla ryngkat bad arngut ki shipai, uwei u paralok Engineer bad u Peon. Wat la ha Tawang ha kane ka por ka ior ka la duna, sha kine ki thain ba kham jrong shuh shuh ka ior ka dang jur bha. Ki don ki

jaka kiba hap iaid lyngba ka ior bad ngam jur haduh khohsiew bad ki don pat ki jaka ba ka ior ka la eh kum u thah ne ka it bad ym lah ban iaid stet namar ka pasiang. Khan tam haba dei ban kiew artet donkam ban da puh ne pom ia ka ior ba la long thah ha man ka jingjam namar ba btuit. Ka jaka baroh kawei ka lieh shuid da ka ior kum ka duriaw ba lieh. Ha ki jaka them jan Bumla ki don ki ing ba la shna ia ki nong-trei ka Sorkar kiba peit ia kine ki khappud. Lah ban ithuh ia kine ki ing na jngai da ka jing-mih jong ka tдем hynrei kine ruh ki la kylla lieh lung. Ha kine ki por khriat wat ia ki pung kiba heh kiba don sha kine ki lum la tap da ka ior bad donkam ban pynum ia ka ior ban ioh ka umdih. Ki shipai ap pahara ki shong ha ki Bunker ne ki krem ba la shna da kaba kynroh da ki maw bad kyrshan da ki dieng. Ka jingim ka long kaba shitom palat namar ka jingkhriat kaba tasam. Donkam ban pynmeh ding baroh arphewsaw kynta bad ban spaiñ pynsyaid iala-de katba lah. Haduh Pakentso kijaka ki dap da ki diengkseh kiba itynnad ba : haba ka hap ka ior, ka suoh ha ki bad ka pynkynmaw ia ka jingrwai 'White Christmas' jong u Bing Crosby. Palat khyndiat na Pakentso haduh Bumla ki don tang ki law bniap dieng tiawsaw kiba la tap da ka ior. Shaphang sepngi pat na Tawang lah ban leit da ka kjat ne da ki kulai shaduh Bumla bad Zemlthang.

Don tang ar ki aiom ha kine ki thaiñ, kata ka aiom ka ior bad ka aiom u slap. Ka aiom u slap ka sdang naduh u bnai May haduh u bnai

October. Ha ka aiom slap, ka jinglong ka bneng ka iai kylla man ka por ; mynstep ka shit sngi bad ka suiñbneng ka khuid bad shai, kynsan kynsan u wan u lyoh khyndew bad u tap dum ia ka jaka baroh kawei. Sa shiphang ka wan ka lyer bad u slap bad hadien khyndiat por, ka bneng ka shai biang kdar. Haba shai bha ka bneng bad ym don u lyoh khyndew ne u slap, katno ka jingitynnad ban peit ia ki lyoh kiba sdien ha ki ranab jong ki lumbah bad kumjuh ia ki lum bah kiba jrong kiba i kumba ki per ha u lyoh. Ki kjat sngi kiba kynjat na lyndet ki lum bajrong ki pynkylla rong laiphew jaid ia ki lyoh bad ym nang batai lait, lehse sa tang kito ki nongdro dur kiba lah ban iathuh ia ka jingitynnad ha ki jingdro jong ki.

Ka jingwan hiar ki Yak bad ki Chowri na ki ranab lum ba kynjang ha kaba ki shang ban pynkdang ialade da u phlang bad ki sla dieng bad ki baje bariew sngewtynnad ba la teh ha ki iyangdang jong ki, ka ai ka dak ba ka tlang kam jngai shuh. Ka bneng ka sdang khriat bha. Ka lyer kaba kjam ka sdang ban beh. U lyoh iong barben ulang ha ki lum. Mynstep, ki kynhun jong ki sim ki king ha suiñ bneng, kumba ki shah rah ha ka lyer na ki bynta ba shatei, bad ki jingpah ba sngewtynnad. Ki tawiar ia ki lum bad ki noh ha ki jaka phlang ki ranab lum hajan shnong Tawang. Kine ki dei ki sim kiba wan na ki jaka ba kham jrong bad ki Monpa ki khot ia ki, ki tyngab ior wat la ki long kiba iong. Ki kham rit ia ki tyngab jongngi shane bad ki kjat bad shyntur jong ki, ki saw. Ki wan poi sha





U YAK



**Tawang** ha u bnai October ne Risaw. Ki dei ki nong kit 'tien Syiem jong ka ior. Phin iohi ia kine ki sim da ki spah man la ka step bad ki jah noh tang shu kut ka jinghap ior ha kine ki thaiñ.


Ka Tawang ka jngai kumba sanspah kilometer na Tezpur bad lah ban leit shane mynta da ka surok kali kaba bha. Ka shnong Bomdi La, ka nongbah ka District Kameng ka don hammar shiteng lynti. Na Tezpur haduh Bomdi La lah ban leit da ka cooperative Bus kaba iaaid man ka sngi lait noh ka lah sngi U Blei. Na Bomdi La sha Tawang, mynta, la pyniaid ia ka Co-operative Bus arsien shitaiew. Ka shimpor ar-sngi ban leit da ka motor na Tezpur haduh Tawang. Ka lynti ka long kaba ma namar ki surok ki dang rit bad ym lah ban pynheh ia ki namar la shu pom ia ki ranab lum maw suda, bad tang bakla, la hap da ki hajar phut sha riat.

Lada leit na Tawang sha Bomdila, ka bus ka biar arsut bad ka iaaid lyngba ia ki shnong rit rud surok kum ka Bomba, Gangklon, Namet, Bomdir, Khrimo bad Lhou, lyngba ki surok ba kyllaiñ. Lynter lynti, ki nhuh ki tiew saw bad ki tiew kosmos ba bun rong ha baroh arliang surok haduh ban da poi ha ka wah Tawang ne Tawangchu, ha kjat u lum Helen ne Helen Point. Ka Tawangchu ka long ka wah kaba stet bha. Ki um jong ka ki mareh kum ki khnam bad ki shoh ia ki mawlong ban pynlieh dud ia ka um ha kaue ka jaka.

Na Tawangchu, ka bus ka klew suki ia ki surok ba kyllaiñ haduh Jang bad hangne ka par suki haduh ynda lait u thlep Jang. Na Jang lah ban iohi ia ka jingitynnad ki lum Gaurishen ha ki thaiñ Chuna bad Mako kiba kup da ki rongksiar ba la airong da ka sngi ia ki kliar lum batap da ka ior, wat ha ki por bym pat hap ior ha Tawang. Na laitlum Jang lah ban iohi kyndiang ia ka Monasteri ka Tawang kaba ieng kum ka kut kaba lieh. Nangne, ka bus ka kdat sha ka diang ban jam sha uwei pat u syntai lum uba kham jrong bad ka poi sha Nuranang.

Ka Nuranang, ha Sela Pass, la ong ba ka long ka jaka kaba khriat tam ha kine ki thaiñ miñngi. Kane ka jaka ka kup da ka lor haduh phra onai ha ka shisnem. Wat la ka jur palit ka jingkhriat, ka jaka ka long kaba itynnad bha.

Ha kawei ka liang jong ka surok ki riat ki ieng kum ki kynton mawsiang ki bym ju kylla dur ne kiba ka mariang kam lah ban pynsniew ia ki bad ha kawei ka liang pat, ia ki lum la tap da ki diengkseh kiba ieng ryntih kum ki shipai ha ka parade. Hangne baroh shisnem ki phuh ki syntiew kiba itynnad bad ki niutmaw kiba bun ki rong, ki um kiba sngur kiba noh na ki kshad kiba jrong kiba par suki ia ki them bad ki sur kiba sngewthiang lyngba ki mawlong bad ki khlaw kiba rben. Shuwa ban poi ha kliar lum Sela Pass, kata ha ka jaka kaba jrong haduh khadsaw hajar phut shiteng ka don ka pung kaba itynnad bad ki han laiphew jaid bad kiba bun rong ki wan ban dem kai,





bym don kano kano ka jingma ne jingpynmyn-saw na ki briew.

Haduh mynta, ha kine ki jaka ki dang don ki dien jong ki jaka rieh shipai' ne ki bunkers ha kine ki lumbah ba la shna da ki kynton maw ban ther pyrshah ia ki shipai China kiba wan hiar thma ha ka snem 1962. Ka jingpynkhreh ha kato ka por ka long kaba jur bad kaba ki rangbah shipai jongngi ki la shngaiñ bha ba u nongshun un ym lah da lei lei ban tur pyrshah hynrei ki shipai China ki la lah, da ka buit jong ki, ban par na ki riat bah bym khmih lynti bad ker kut ia ki pyrton ka ri India jongngi hangne.

Ka mariang hi ka ioh ka lad ban pynkup pynsem ia kine ki jaka da ki rong kiba itynnad. Ha ka por tlang pat, ynda la hap jur ka ior, baroh ki kylla lieh pad ia ki surok la siang da u thah uba rben. Ka long kaba eh ia ki motor ban raid lynda teh ia ki shaka jong ki da ki kyniri nar ban lait na ka jingbtuit ne syntuid.

Na kliar ki lum Bah ka Sela Pass lah ban iohi, sha kawei pat ka liang, ia kiwei pat ki jingitynnad. Ki lyhuh kiba jrong ki don ha baroh arliang surok, ki dieng 'sehbah, ki kliar lum kiba nep sha ki phang Bhutan bad ba i kumba ki kynduh bneng, ki surok kyllaiñ bseñ kiba noh shaduh kjat lumbah sha Saper. Kine ki jaka ki long kiba i ma shibun, wat tang ban shu jngoh na ka kali, namari kumba kintan shariat. Teng teng, kynsan kynsan, u lyoh barben u wan tap bad ym lah ban iohi ei ei ruh,

sa shiphang, la paw blang ka jingitynnad. Teng-teng, napdeng ki lyoh stang, ki wan ki kiat sngi bad doh ia ki umjer kiba snoh ha ki tduh ki sla kseh bad ki pynlong ia ki kum ki mawlynnai ba khñh khrik khrik. Kine ki jaka ki long shisha ki jaka basuk, baitynnad bad ba shong ki Blei. La kyrteng ia kane ka jaka ka 'Shangrila' ne ka jaka shong ki Blei ha ka jingitynnad bad jing jar jar Ngim lah ban pyrkhathaduh katno ka jingtreishitom kito kiba la shna ia kane ka srok ban pynkyllan naduh trai haduh khlieh da kaba pom ia ki maw kiba eh bad ha ka jing-khriat kaba jur. Hangne la pynieng ia u mot bad la thoh ia kine ki ktien—

Builders may die  
But the Road will survive.  
(Ki Nongtei ki lah ban iap  
Hynrei ka srok kan im )

Shisha, mano ban kynmaw ia kito ki nongtei kiba la buh ia u maw halor u maw bad mano ba ju tip ia ki ruh, hynrei, dei kine kiba leh ia ki kam kiba khraw tam ban suk ban bit ki para briew—kine kin ioh ia la ka nong.

Na Saper, ka kali ka iaid ia ki madan haduh Dirang—ka jaka kaba madan harud ka wah Mewang kaba ki khot Mewangri. Hangne ngi iohi ba ki Tawang Monpa ki khot 'Chu' ia ka wah katba ki Dirang Monpa ki khot 'Ri' Ka Dirang ka don tang san hajar phut na sla duriaw, kata kat ka jingjriong jong ka Shillong hynrei la khot ia ka—ka them Dirang namar ka



jingjrong ki lumbah sha kine ki jaka. Ka Dirang ka long ka shnong kaba seisoh bha. Hangne ki rep ia u khaw, u krai, ki jhur bad ki soh apple, soh plom, sohphoh bad soh phareng. Ia ka Dirang lah ban ong ba ka long ka thiar jong ka District Kameng namar ka long ka jaka kaba selsoh bha. Lynter ka wah Mewang ne wah Dirang, ki Monpa, kiba phong ki shna kut (coat) saw kiba ki khot Ghol Geithang bad la ki ryngwiang kiba shi lnger siej, khlem bteng, ki ia khwai dohkha da ka rukom kaba phylla bha. Kim ju teh khwai ne suh jingbam. Ki khwai da kaba syrdoh ia u ksai bad pynngam ia u sisa uba heh ha ki lat lat. Hapdeng i syrdoh ba pyllun ki buh i kynja kpieng bad ka dohkha haba ka ialeh ban ioh ia ine i kpieng, iba ka tharai ba l dei i jingbam, ka kum rung ha ine i syrdoh pyllon jong u ksai bad ka phasi ialade. Ki dohkha kiba don ha kine ki wah ki long kum ki trout kiba thoh lane ki spotted trouts.

Na Dirang, ka kali ka kiew suki haduh Bomdi La, kaba don kumba hynñiew hajar phut na ka sla duriaw.

## Ki Monpa—Ki Nongshong-shnong ka Tawang

Ka Tawang ka long ka jaka shong jong ki Monpa. Ki Monpa ki long ki briew kiba jar jar bad ki kham pher na kiwei pat ki jaid kiba shong ha kiwei pat ki bynta jong ka Arunachal. Ki bud ia ka niam Buddhist bad ki don ka jinglong babha, basbun ha ka jinglong jingim jong ki. Ka jingiakyrsht jong ki bad ki nong Tibet bad Bhutan bad ka jingiashong kha khleh ka long kaba kynrei katta katta bad kane ka paw na ki Karpet ba ki thain, ki jingdeng ba ki deng bad ki rukom oh dur da ki kti. Ka Jingiashong kha khleh ka mih na ka jingiakhain pateng, bad khamtam ka jingwan buhai shnong ki nong Tibet ha ka por ka jingphet shnong U Dalaí Lama, ha ka por ba ki China ki wan hiar thma ia ka Tibet. Kiwei pat ki jaid bynriew ha Tawang ki long ki Sherdukpen, ki Khowa, ki Akas, ki Minis kiba don tang khyndiat bad ki kham shong ha ki jaka ba kham them kham syaid. Kine kim ngeit ia ka niam Buddhist.

Ki Monpa ki shong ha ki ing ba la shna da ki maw bad sorki da ka 'dewbyrtha. Ki pyn-donkam da ki siej ba la pynlong tyrpait heh ne da ki kynja lyntang stang ban tap ia ka tnum. Ia ka madan ka ing, ki siang da ki lyntang kiba heh bad barben kiba ki la shtah na ki diengbah kiba la iaw bha. Ia ka dpei ki buh ha ka kamra heh bad ka ding ka meh baroh shisngi bad ki thang da ki dieng tylli kiba heh bad ba-

jwat. Ha dpei phin tohi barabor ia u ketli uba. Ia long pring bha namar ia une la shu buh ha ding bad ngi bad miet. Ka kmie ka ing bad la ka apron kaba iong rben bha bad ka tupia. Monpa ba pyllon bad ba don lai ki tdong, ba la shna da u sñiuh jong u yak, ka theh sha ia kiba wan kai man ka por. Sawdong ia ka dpei, ki buh ia ki jaka shong kum ki kushon (cushion) rben ba la suh rben bad sop da ki jain byrni ha ka jaka ki lyngkhot namar ka jingdaitthah kaba palat. Ki briew ki dang dum bha bad ka jingkhriat ka pynlong ia ki ban sop syaid bha ialade. Ka jingbun ki jaiñ bad ka jing bymlah ban sait ia ki barabor, namar ka jingkhriat, ka pynlong ia ki, ki briew kiba tngit. Ka jingdum, jingtngit bad ka jingduk ka wanrah bun ki jaid jingpang, khamtam ki jingpang sniehdoh, kum ka prum, ñiangdait bad kiwei kiwei.

Ka jingbam kaba kham kongsan jong ki Monpa kiba shong ha Tawang ka long, u Barli, u Krai, u riew hadem bad u Kew, kine ki long ki jingbam kiba ki briew ki rep h - kito ki jaka ba kham jrong bad ki bamia ruh, kito kiba rep ia u khaw ha ki jaka ba kham them. Ki bam ka doh yak wat la ki long ki Buddhist bad kim bit ban pyniap, bad ka khi jong u yak. Ki dih da ka sha mluh kaba ki khleh ha ka tyndong siej da kaba dung ia u slasha bad ki sa ai mluh khyndiat bad ka makhon yak ban bang. Ia u Barli, kraï, riewhadem bad u kew ki tylliat ha ki ing tylliat. Ia kine ki ingtylliat, ka shnong ne uno uno u briew uba lah bor u tei halor ka wahduid kaba laid stet bha ka um. Ki shna sa

ka kynja shalyntem dieng kaba syriem ia ka shalyntem thirksai ha ka dur bad ki pyndait skhem ia ka ha u dieng uba jrong uba ki phrung na ka thliw ba la pynpei khnang shapoh ing sha jrong. Ha une u dieng uba pei haduh poh ing pat ki pyndait ia u maw tylliat. Kham haneng kane ka ing tylliat ki den ia ka um bad ki pyllait tang haba ki donkam ban tylliat ia ki jingbam khnang ba ka um kan ia id stet. Haba ka um ka shoh ia ka shalyntem dieng kaba don hapoh um, kane ka shalyntem ka shad ; kumjuh ruh ka shalyntem maw kaba don hapoh ing, sha jrong, ka shad. Halor une u maw shalyntem hapoh ka ing ki pynshong sa uwei pat u maw tylliat uba ki la shna bad ka kynja jingbat ban pynkhih pyllun pyllun ia u. Hangue ki briew ki theh ia kitei ki symboh jingbam ha ka thliw ha une u maw, ba la buh kyrpang, bad ki tylliat ia ki ha ban da long ata ban shet ban bam. Mynta ki briew ki ia loh u ata bad u khaw ba aika sorkar ne ba wanrah ki nongkhahi. Ki sinat bha ruh ban pdem, ne shna 'tungrymbai bad ki tylliat shatni da u sohmynten.

Ki Monpa ki long ki briew kiba trei ba ktah bha. Namar ka jaka ha kaba ki shong ka riat bha bad ka khyndew ne sboh kam neh ban thung ban tep, ki shna ki nur pynkiang ne ki terrace ha ki lum ban thung ban tep bad ki kynroh ne kynton da ki maw ia ki jaka rep. Ki long ki briew kiba ieit bad bang bha ban thain karpet bad kiba ieit ia ki jingri jong ki kum ki kulai, ki yak, ki chowri bad ki langbrot. Ki long ki briew kiba don akor, kiba jai jai bad kiba wad



U Nongthoh ha ka Bangla ba u shong ha Tawang.



ia ka jingialong lok. Ki dei ban trei shitom bha  
 ban im. Ki seng ia ki kyntoit shnong kiba rit  
 hangne hangtai ha ki sharing jong ki padun lum-  
 bah bad ha kine ki jaka, ki trud ia ka khyndew  
 ban pynmih jingbam. Ki leh kumne ha ki jaka  
 kiba kham them hynrei ha ki jaka ba kham sha  
 jrong pat, ki ri jingri. Namar ka jaka ka long  
 kaba bun maw, ki jaka rep ki long kiba khyndiet  
 bad kim biang satia ban pyndap jingbam baroh  
 shisnem shisnem ia ki. Dei kane kaba pynlong ia  
 ki ban saphret saphrong bad ban seng ki shnong  
 rit kylleng kylleng ha kiba ki leh ban ich ia ki  
 khyndew rep Bun na ki, ki im da kaba shu  
 trei surok, bylla shna ing sorkar, thain karpet,  
 shna shang, shna kriah ne shna shyllieh, shna  
 kot sada bad kiwei kiwei.

---

## **Ki jinglehniam leh rukom ne leh sngewbha jong ki Monpa**

Katto katne ki jinglehniam leh rukom ne jingleh sngewbha jong ki Monpa kiba kham donkam ki long kine harum :—

*Ka Dungur :* Kane ka long ka jinglehniam kaba heh tam ha Tawang bad ki pynlong ia kane shisien ha ka laisnem. Kane ka neh laisngi lynter. Ki briew najan bad najngai ki wan ban pyndap ia u lum ha uba ka don ka Monasteri bad ia ki jaka kiba marjan. Ki jaiñ kiba itynnad bad babun rong ba ki phong ki shat bha ia ki khmat haba peit pyrshah ia ka jingleh jong ka ior kaba tap ia ki lum bad ki madan. Ki briew ki ia wan ia bam ia dih sngewbha. Na ki jaka kiba kham them ki briew ki wan rah sohñiamtra, u sying, ki sohmynten, ki phankaro, u pai bad ki jhur bun jaid; nangta sa ki jaiñ banat, ki paila had ki jingdeng rupa ba har rukom bad u lum baroh uwei u long kum ka iew ne ka mela. Ki ia die ka sha bad ki momo ba ki shet hi da u ata bad ka doh yak. Ki briew kiba wan sha kane ka jinglehniam ne jingleh sngewbha ki bam kdang da kine ki momo.

Hapoh kine ki laisngi, ki pynlong ki jingialeh-  
ka Drama kiba itynnad ha ka madan hapdeng ka  
Monasteri da kaba ki riam ki jingriam kiba kor-  
dor, syriem ia ki khor ki khriam bad ki bula ha ka  
dur briew bad dur mrad laiphew jaid kum ki sier,



ki khla kiwei kiwej. Kine ki jaid jingialehkai ki long kiba don la ki jingmut, kum ki kynja thma hyndai ne ki jingbehmrud kiba don ha ka Hima Tibet. Ia kine ki jaid Drama ki pyni tang da ki jingshad bapher bapher bad ki jingpyni dak da ki jingpynkhih ki dkhot met ki nongshad ryngkat ka jingpynbud ka put ka tem. Ki long kum ki Dance Drama. Ia kine ki jingialehkai bad ki jingput jingtem la pynbeit da ki riewniam ne Lama ka Monasteri kiba pynbiang ia ki riam ki beit baroh.

Ha kine ki laisngi, u Rangbahniyam ne u Lama rangbah, u Rhimpojee, u khot bam sngewbha ia ki riewdonburom hapoh ka Monasteri bad kum ha kine ki jingkhawai ki pynbiang ki jingham laiphew jaid ba la khreh kyrpang kum ki dohsniang thad ba la ot stang, ki momo, u chow, ka doh blang, doh yak bad ki jingshet jhur ba lashet bad khreh da ki nongshet kiba ki khot kyrpang.

Kiwei pat ki jinglehniyam leh rukom ki long ka Torgia, ka Cepo Camo, ka Gigo Sangdhui, ka Dhumpa Sandhui, ka Ghong Buwang bad ka Losar.

*Ka Losar :* Kane ka dei ka jinglehniyam leh rukom bad lehsngewbha snem thymmai. Ia kane ki rakhe bun sngi. Shuwa ban pol kane ka jinglehniyam, ki briew ki ia bun kam ha kaba pynkhreh ia ki khabse, ki shemar, ki changfut bad ha kaba pynkhuid ia ki ing ki sem bad ban tab ki karta ha ki biar ing. Ki Khabse ki long ki kynja jingbam ba ki pynkhreh na ki jaid jing.

mih ba ki wop hi bad ki Changfut pat ki long  
 ki kynja jingdih ne ki klad. Arsngi shuwa kane  
 ka jinglehniam leh rukom, ki briew ki bret lut ia  
 ki synrum synram bad ki jakhlia jakhlaid na ki  
 ing ki jongki bad ki ngeit ba da kaba leh kumta,  
 ki bret lut ia ki jingpang bad ki ksuid ki khrei  
 baroh na ing. Hadien ki sa tah ki karta ne tah  
 ata ha ka biar ing kiba long ka jingngeit jong  
 ki ba ia ka ing thymmai jong ki la shna ha  
 kawei pat ka jaka ha kaba kin sa shong, kaba  
 lait na ki jingjakhlia bad ki ksuid ki khrei.  
 Hadien kata ki pynkhuid pynbeit ia ki kamra ha  
 kaba ki buh ia ki soh jingbam ne ki jingmih na  
 lyngkha kum ki jingkha ainguh ia U Trai  
 Kyarad. Ki sngew ba dei ban ai shuwa sha U  
 Blei ia ki jingmih ne jingioh baroh namar dei  
 ma U Uba la kyrkhu ia ki.

Ki don bun jaid ki rukom lehniam hapoh  
 kine ki sngi Losar. Kawei na ki ka long ka  
 Yulha Losar ne ka rukom lehniam sieh lama.  
 Ha kane ka sngi, kawei pa kawei ka ing ka sieh  
 lama ha tnum ing bad ki duwai ba U Blei Un  
 ai ka spah ka phew bad ka jingkoit jingkhiah.  
 Ha ki jaka iaid paitbah bad ha ki lum kiba mar-  
 jan ki sieh ki dieng lama bad ki pynher ki  
 lama kiba jrong kioa doa ki jingthoh ba ki ktien  
 Tibetia kum ki jingduwai ba baroh kin long  
 kiba dap ba biang, bakoit ba khiah bad ba ma  
 bha ha ka jingim jong ki. Ki Monpa ki ngeit  
 roh ba ka lyer kaba pynher ia kine ki lama ka  
 ai jingkykhu kat ia kiba ka jakynduh ha ka  
 jingaid jong ha. Nangta ki shna ki dur khlich  
 biang ba ka dieng ne uata bad ki tah ia ka ha

la ing ~~ban~~ pyai ba ka lehnam leh rukom  
 Losar ka sdang ha u bnai Lug (Blang) jong ka  
 snem Buddhist. Nangta bud sa ka lehnam  
 Lhapsang bad ki Monpa ha la ki ing ki sem ki  
 la pule la ki kot niam kum ki Bum, ka Niti bad  
 ka Cetong katba ki lah ban pule. Ki leh niam  
 ruh kumta ba baroh ki mynsiem kin iakynduh  
 lang hadien ka jingiap.

Hadien katto katne sngi, ki tymmen ki leit  
 sha ki Compas, ki Mane bad ki jaka kyntang.  
 Ki thang ia ki sharak bad ki duwai ia U Blei ba  
 Un map ia ki pop bad ba Un ai ha ki ka jingim  
 kaba pahuh-pahai. Ki samla ki ia kiew sha ki  
 lum bad thang ia ki sla kseh kum ka jingainguh  
 thang ba iwbi ha khamat U Blei ba Un ai ia ki  
 ka jingkoit-jingkhiah bad ka jingroi-jingpa ha ki  
 snem ban dang wan bad ki teh ki kotkudi ba la  
 ot ribon ha ki d'eng.

Ki Monpa ki long kiba ieit bha ia ka shad  
 ka kmen. Ki shad bad ki jingphong khlieh bula  
 bad ki jingriam kiba pher bapher. Ki jingshad  
 kiba kham kongsan eh sha kine ki thun ki  
 long—ka shad klew, ka shad sing, ka shad yak  
 bad ka shad Raja Rani. Kawei pa kawei ka  
 jingshad ka don la ka jong ka jong ka jingmut.

*Ka shad yak* : Ia kane ka jingshad ki pyn-  
 long man ka snem ha ka shnong Bomba ban  
 kynmaw burom ia ka Yak Seli Drema kaba  
 long ka daw jong ka jingroi-jingpa jong ka  
 shnong. Ki puriskam ki ong ba bun bun snem  
 mynta, la don ha kane ka shnong ki shi ing—U

Nyak Pe pheshai, ka lok jong u ka Shomma Shour Kejomba bad ki khun jong ki—u Hema Darge, u Thepa Gralle bad u Gava Sundru. U khun u baar, u Thepa Gralle u long barabor uba jaboh jabaiñ bad ha ing ki ju beiñ ju khoh ia u bad kim ju iajan bad u. Kim ju ialam ia u shano shano.

Ha kawei ka sngi, u Thepa Gralle u la kut jingmut ban phet noh na ing Kiba ha ing jong u baroh ki la ia kmen ban tip ia kane. U kpa jong u u la ai ia u ka tupia Monpa, ka kmie jong u ka la ai ia u ka soptilor kaba syaid bad ba la jot, u hymmen jong u u la ai ia u, u tyllai bad u para jong u, u la pyinkbreh bam ha lynti.

U Thepa Gralle u la mih bak bad u la kiew ia ki thiep kiba jrong haduh ba un da poi sha u lum kup that uba ki khot 'Lama Simnila'. Ynda u la shong thait shiphang u la nang leit bad poi ha ka pung um kaba ki khot 'Lhimka'. Hajan kata ka pung, ha ki thynram dieng, u la iohi ia kawei ka sim kaba beh kaba dem halor lai tylli ki pylleng kiba la ka rong ka rong. Kawei na ki kaba lieh, kawei kaba saw bad kawei pat kaba iong. U la iohi kynsan ba kata ka pylleng kaba lieh ka pait bad mih i khun yak iba mareh sha khlaw. Hadien kata u iohi ba pait sa ka pylleng saw bad mih i khun Yak iba shah rong noh ha u kynja ksuid uba ki khot u Chou Keepy Lungten. Hadien kata pait sa ka pylleng iong bad i mih i khun Yak kynthei iba lambyrlieh iba hadien ki khot Seli Drema Cyhemi. U Thepa Gralle u la shim ita i khun yak bad u la teh ia

i da u tyllai ba u hynmen 'ong u u la ai ia u.  
 Hadien khyndiat snem ka Seli Drema ka la kha  
 da ki phew tylli ki Yak bad u Thepa Gralle u la  
 kylla riewspah.

*Ka shad Raja Rani ne Gepo Gemo :* Kane ka  
 rukom shad ruh ka don la ka jong ka puriskam,  
 Ki ong, haba ka niam Buddhist ka dang khie  
 rasong bha ha Tibet, laingut ki Syiem ryngkat  
 bad U Ano Tashi kum u nongialam, ki la kut  
 jingmut ban leit sha Tibet ban mane Blei hangto.  
 Ki Syiem kynthei ruh ki ia kwah leit lem bad ki.  
 Ki lok jong ki ki la pyni ia ki jingeh kumno ba  
 kin hap iaid bunsngi bad sahmiat ha ka ior bad  
 ba kin ym ioh jingbam ha ki lynti kiba jngai,  
 hynrei ki syiem kynthei kim kwah ba ki lok  
 jong ki kin leit hi Ki ong ba kin iarap ban shna  
 ki jaka shong, kin ialum ne tam diengiap ban  
 sliew ding bad ban pynshet jingbam ia ki bad  
 ki kloï ban die lut ia la ki jingdeng jong ki ban  
 thied jingbam ban rah ha lynti. Kumta baroh  
 ki ia leit bad ynda ki poi ha Mouyul, ka jaka  
 kaba dang jngai na Tibet, ki la bakla lynti, Shu  
 donbok kumno kumno ba uwei u Monpa bad  
 arngut ki samla ki iakynduh ia ki bad ynda ki  
 la tip ba ki dei na ing Syiem, ki la leit on  
 lynti ia ki shaduh Lhasa bad pyni ia ki ia ki  
 jaka mane Blei.

Haba u ne ka Monpa ki iap, ki 'riewniam  
 ne u Lhama na ka Monasteri u wan ban pyn-  
 dep ia ki jinglehniam kiba iadei bad ka niam  
 Buddhist. Kane ka jinglehniam ka lah ban neh  
 naduh shisngi haduh artalew. U Lhama, ynda

u la peit ia ki kot niam, u rai na kano ka liang  
 la ka met iap dei ban pynmih na ing, kata na ka  
 liang sepngi ne mihngi, shatei ne shathie. Lada  
 ym don jingkhang ne pongshai na kata ka liang  
 dei ban pypra ia ka biar ne kvnroh ing. Ia ka  
 metiap dei ban leit kit sha Tawangchu ne wah  
 Tawang da ki lai ne san ne hynñiew ngut ki rang-  
 bah. Ynda poi ha wah, kine kin daiñ lyngkhot  
 lyngkhot ia ka met bad bret sha um. Ia kane  
 ka kam yn ym don ba nud ban leh hynrei la pyn-  
 dep ia ka hadien ba kine ki briew ki la buaid bad  
 kim tip briew shuh. Ki Monpa ki ngeit ba u  
 briew u long uba myntoi ha ka imlang sahlang  
 haba u dang im ba u dei ban long uba myntoi  
 ruh ynda la iap ia ki jingthaw kiba im ha um.

---

## **Ka China, Tibet bad India** *(Hapoh ka Jingsynshar ki Phareng)*

Ki Phareng kiba bat ia ka jingsynshar ia ka ri India hapoh ka East India Company ki don ka jingmut ban ioh ban ia khaii ia pateng bad ka Tibet lada don lad. Kin jin da ia pynbeit ia kane bad ka Tibet hynrei u nongmihkhmat jongki hi uba don ha China u pyrkhath ba ka Tibet ka don hapoh ka jingpeit jong ka China bad kumta lada ki Phareng ki kwah ban iateh khaii pateng bad ka Tibet, ki dei ban iapynbeit bad ka China. Ka China pat kam kwah ba ki Phareng kin ia pynbeit iakhaii ia pateng da ma ki hi bad ka Tibet ioh ba ka Tibet kan sogew ba ka long ka ri kaba laitluid bad ba ka China kan duh noh ia ka jingiadei jongka bad ki kam poh ing ka Tibet. Ka China ka pyrshang man ka por ban pynpulom ia ka jingangnud ki Phareng ban tip khambha shaphang ka Tibet. Hynrei ka China kum ka ri kaba tlot kam lah ban khang ia kane ka jingkwah ki Phareng ban iateh khaii bad ka Tibet bad kam lah hi ban pynbor ia ka Tibet ban leh kumta. Dei hadien ka jingwan jong u Lord Curzon kum u Viceroy ka India ba ka jingtharai ki Phareng ba ka China ka don bor ha Tibet ka long kaba bakla. Ki shipai phareng haduh kumba sawhajar ki la tur na Sikkim sha Tibet bad pyndem ia ki shipai Tibet. Hadien kata ka la don ka jingiakut ha ka hynniew tarik u bnai September ka snem shihajar khyndaishpah saw ha kaba kawei na ki kyndon ka long ba ki Phareng bad ka Tibet kin iakut thymmai ia ka

jingiategh khañ pateng bad ba kawei pat ka ri kan nym don hok ban iakhai bad ka Tibet. Ka China ka bym shym ia dou kti ha kane ka jingiateh kular ba la iasoi ha Lhasa, ka la sheptieng ba yn nym don ba khein shuh ia ka hok jongka ban ia tuklar ia ki kam poh ing ka Tibet bad wet ha ka jingiadei bad ki kam bar ri, bad ban ai ruh ka lad kaba kham bha ia ki phareng ban long ki nongiada ia ka Tibet. Hynrei ha kane ka por ki Phareng ki tieng ia ka Russia ioh ka wan tap pud sha kine ki jaka, kumta kim banse ban pdiang ia ka jingdonbor ka China ha Tibet bad ki la twad jingmut na ka China ia kane ka jingiategh kular bad hadien ki jinglakren la pynlong biang ia ka jingiategh kular hapdeng ki Phareng bad ka China ha ka snem shihajar khyndai spah hynriew. Kane ka jingiakut ka ai ka hok ka jinglong khlieh ka China halor ka Tibet bad ka pynkup ia ka China ia ka bor kaba ki Phareng ki bat kat kum ka jingiakut ka snem shihajar khyndaispah saw, kumta ba ka jingiada ia ka iot ka Tibet kan long ha ka kti ka China. Kumta ki Phareng ki la pynioh ia kane ka hok ia ka China ha Tibet kaba ka China dalade hi kam lah ban pynioh ha ki laiphew bad sawphew snem. Ia kane ka jingiakut ka snem shihajar khadkhyndai spah hynriew ym shym pyntip ia ka Tibet. Ha kajuh ka por ki Phareng ki la iategh kular pat bad ka Russia ha ka snem shihajar khyndai spah hynriew da kaba ki Phareng ki kular ban nym ia tuklar ia ki kam ba iadei bad ka Tibet hynrei tang lyngba ka China bad ki Phareng kin nym phah nongmihkhamat shuh sha Lhasa. Ia kane ka jingiategh kular bad ka



Russia ruh ka Tibet kam tip. Ki Phareng ki la leh ia kane tang ban myntoi ka khañ pateng lajong da kaba pynduh ia ka hok ka jinglailuid ka Tibet, wat lada ki Phareng ki tip bha ba ki briew jong ka Tibet kim don jingiadei jan ei ei bad ki China bad ba kim ju shah ialade hapoh ka jingsynshar ne jingpyniaid ki China.

Ha ka snem Shihajar khyndai spah khyndai ka China ka la knieh da ka bor ia ka jingsynshar na ka Tibet kat kum ka jingiateh kular bad ki Phareng kiba la pynioh ia kane ka bor bad kam shah ia kano kano ka jingiakren jong ka Tibet bad ki Phareng khlem ka jingtip jong ka. Ka Tibet kaba la pan jingiarap na ki Phareng kam shymioh jingiarap namar ki Phareng hi kim kwah ban duh ia ka hok ha ka khañ ka pateng kumta kim treh ban leh eiei, wat tang ban shu thoh ka jingsngew pyrshah ia ka e ka jingleh jong ka China. Ka China pat ka jubab ba ka jingphah shipai ka long tang ban ap-pabara ia ki lynti khañ pateng. Pynban ha ka snem Shihajar khyndai spah shiphew ka China ka la pynpoi haduh arhajar ngut ki shipai ha Lhasa. U Dalai Lama u la hap phet na Tibet bad ki China ki la shimti halode ia ka jingsynshar ia ka Tibet. Kane ka jinghiar thma ka China ia ka Tibet ha ka snem shihajar khyndai spah shiphew ka la long ka dak ka jingkylla ha ka jingiadei lapdeng kine artylli ki ri—ka China bad ka Tibet. Ka long ka sien kaba nyngkong ha ki shipai China ki wan poi ha Lhasa khlem ka jingmynjur ki nong Tibet Myrshuwa ia kane ki shipai China ki wan tang ban lada ia ka Tibet na ki nongshun kiba

pynsyier na shabar ri bad ka Tibet kam ju  
 pyrshah ia kata. Wat lada ka Tibet kam pdiang  
 ia ka jinglong khlieh ka China, ka Tibet kam ju  
 pyrshah ia ka jingphah nongmihkhmat U Syiem  
 China ne ka jingbuh shipai ha Lhasa. Hapoh ki  
 arspah snem ba mynshuwa ia kane, u Syiem  
 China um ju tuklar ia ki kam ing ka Tibet bad  
 ia ka jingiadei iajan kine artylli ki ri Ka jingioh  
 ki Phareng ia ka Tibet kala kylla long pynban  
 ka jingioh long khlieh ka China halor ka Tibet.  
 Ki Phareng hi ki pynbor ia u Dalai Lama ban  
 pdiang ia ka jinglong khlieh ka China halor ka  
 Tibet. Kane ka jinglong khlieh ka China halor  
 ka Tibet kam shym neh slem namar ki nong  
 Tibet hi kim aili ia ki China bad ki iai pyneh  
 bad pynwit ia ki ha man ki kam. Ka leit jia  
 ryngkhat ba ha ka snem shihajar khadkhyndai  
 spah khadwei. U Syiem bad ka Syiem China  
 ki iap bad ka la don ka jingiakhieh kaba jur  
 hapdeng ki shipai China bad kim kohnguh ia ki  
 bahalor jongki. Kane ka la ai lad ia ka Tibet  
 ban ialeh pyrshah ia ka China bad ha ka snem  
 shihajar khyndai spah khadar la lah ban pyn-  
 kynriah ia ki shipai China na Lhasa. U Dalai  
 Lama uba la phet na Tibet u la wan phai pat  
 bad u la pynbna ia ka jinglailuid ka Tibet Ka  
 Sorkar Tibet ka la pynkhlaia ia la ki shipai iada  
 ri bad hadien sawphew snem ki China kim ju  
 pynwit shuh ia ka Tibet. Ki Phareng hi jar-jar  
 kim pdiang ia ka jingpynbna lailuid ka Tibet,  
 kim ngeitruh ba ka Tibet, ka ri kaba tlot ka lah  
 ban ieng ha la ki jong ki kjat pyrshah ia ka  
 Russia kaba tur bor bah na Mongolia bad kaba  
 lah ruh ban wan buhai ia ka Tibet. Hynrei namar

ba kam kwah ban long ialade ka nongiada ia ka Tibet ka kwah ba ka China kan long ka khlieh balor ka Tibet bad nongiada ia ka. Kare kan khang lad ia ka Russia ban tur sha Tibet. Ha kajuh ka por ki Phareng kim kwah ba ki shipai China kin don ha u pud ka ri India bad Tibet. Kumta ki kwah ba ka Tibet kan ioh ka bor kaba kyrpang ha ki jaka khap pud ka Tibet bad ka India kumta ba kan nym donkam ban pynlut ha kaba buh ki uongap pahara ha u pud India Tibet. Da kane ka jingthmu ki phareng ki la phah ktien sha Tibet ba ki kwah ba ka Tibet kan ioh ka hok synshar ialade hapoh ka jingkhmih ka China bad ba ka China kam dei ban ia tuklar ia ki kam pohing jongka. Ha kajuh ka por ki phareng ki phah ktien sha China ha ka snem shihajar khyndai spah khadar ba ka China bad Tibet ki dei ban iapynbeit ban pynioh ia ka Tibet ia ka kyrdan ba ka dei ban ioh. Ka China kaba don ha ka jingsyier ia ka jingwan tur ka Russia ha ki jaka kiba hap hapoh ka China ha Mongolia kam banse ban pyrkhath ia kane ka jingbyrngem ki Phareng ba lada ka China kam mynjur, kin ia pynbeit hi tang bad ka Tibet. Kumta ha ka hynriew tarik u bnai October ka snem shihajar khyndai spah khadlai kine lai tylli ki hima, kata ki phareng, ka China bad Tibet ki la iakynduh ha Tibet. U nongmihkhmat ki phareng u long u Sir Henry Mc. Mohon, u nongmihkhmat jongka China u long u Ivan Chen bad u jong ka Tibet u long u Myntri Lonchu Satra.

Ha kane ka jingiakynduh, ka Tibet ka la dawa ia la ka hok ka jingsynshar hi ia la ka ri ne

ka jinglailuid na ka jingsynshar ki nongwei, ka jingpyndam noh ia ka jingiakut hapdeng ki Phareng bad ka China kaba ha ka snem shihajar khyndai spah hynriew bad ka jingpynthymmai ia ki jingiateh khari pateng. Ka Tibet ka dawa ruh ia ka jingbuh pud bad ka China bad ka jinglong trai ia kito ki jaka kiba shong ki nong Tibet baroh kata haduh Tachienlu bad Koka Nor.

Ka China pat ka dawa ia ka hok ka jinglong nongsynshar ia ka Tibet ka da pynshongnia ia kane ka jingdawa da ka jingjop thma ka China ia ka Tibet naduh ka por U Chengis Khan. Ka dawa ruh ban buh u nongmihkhmat bad arhajar ngut ki shipai ban iada ia ka Tibet na ka jingwan hiar thma kiwei pat ki ri bad ia ka jingpyniaid ia ki kam kiba iadei bad kiwei pat ki hima. Ka China ka dawa ban pynim biang ia ka jingiateh kular hapdeng ki Phareng bad ka China jong ka snem shihajar khyndai spah hynriew Ki dawa ba u pud bad ka Tibet un iaid lyngba ka Giamda kata hynriew phew mile shaphang mihngi na Lhasa. Da kane, ka China kan ioh bun ki jaka jong ka Tibet kiba ka China kam ju bat lait tang ha ka por ka jingwan hiarthma u Chao Erh-teng khyndiat snem mynshwa.

U nongmihkhmat ki phareng- U Mc. Mohon u long u ksiang ban pynbeit ia ki jingdawa kine artylli ki ri. Khnang ban iampir ia kine ki jingdawa bad ban iapoi ha ka jylli kaba kham jan, ki Phareng ki la buh ka jingtyrwa ia ka hok ka jingpyniaid synshar khadar lade bad ka jinglong kynrad nongsynshar da kaba kyrmen ba ka

jinglaw ia kine ki kyrdoh kan wallam ia ka jing-suk hapdeng kine artylli ki ri. Ki phareng ki kwah ban wan rah pat ia ka jinglong ka synshar khadar bad ka jingiadei ki ar hima kumba ka la long shuwa ka snem shihajar khyndai spah saw da kaba khmih lynti ba kane kan pynioh ka Sor-kar trai ri kaba skhem ia ka Tibet kaba lait na ka jingmushlia kiwei pat ki ri bad ka jingiadei kaba kham jan bad ki Phareng. Hadien ka jingpynbor ki Phareng ka Tibet ka pdiang ia ka jinglong khlieh duh ka China tangba kam lah ban mushlia ia ka jingpyniaid ia ka jingsynshar-khadar bad ki kam pohng ka Tibet. Nalor kata, dei ban da don ruh u pud ia ka jinglong khlieh duh ka China ha Tibet. Ka China kam lah ban phah ki shipai ki swar jongka sha Tibet lait tang uwei u nongmihkhmat bad ki nongbud jongu. Ym lah ban pynlong Jyila ia ka Tibet hapoh ka China lane ba ka Tibet ka dei ban phah nongmihkhmat sha ka Dorbar thawaiu ka China. Ka Tibet ka kwah ruh ban don u nongmihkhmat ki phareng ha Tibet ioh don kano kano ka jingleh bym dei u nongmihkhmat ka China. Na ka daw ba ki phareng ki don ka jingiateh kular bad ka Russia kaba pyrshang ban tur sha Mongolia pyrshah ia ka jingiakut, ki phareng kim mynjur ban phah nongmihkhmat sha Tibet.

Ka jingeh ka mih ha kaba pynbeit ia u pud Tibet shaphang mihngi. U Mc. Mohen u la thaw lad ban law ia kane ka jingeh da kaba tyiwa ia ka Tibet ba shapoh bad ka Tibet ba shabar. Ka Tibet bashabar ka iakhap pud bad ka India

ha kaba ka Sorkar Tibet ha Lhasa ka pyniaid ia ka synshar khadar bad u pud ba shatei u iaid haduh ka wah Yangtse Une u pud u la don la slem bah. Ka jaka Tibet shaphang mihngi na une u lain yn khot ka Tibet ba shapoh ha kaba u Dalai Lama un peit bad long khlieh halor ka jingleh niam leh rukom bad ka jingpyniaid ia ki ingmane ne ing shong ki lyngdoh niam (Monasteries) hynrei ka jingsynshar khadar kan hap ha ka kti ka China. Hadien ka jingiapynbeiti kaba neh haduh hynriew bnai la lah ban pynbeit ia kane. Kat kum ka jingiapynbeit, baroh ki jingiakajia ki ban mih hadien hapdeng ka China bad ka Tibet dei ban pynbeit da ka Sorkar phareng. Ia u pud ba hapdeng ka India bad Tibet ba la pynbeit kat kum kane ka jingia-kut (Convention) la tip hadien kum u Mc. Mohon Line.

Hadien, ka Sorkar China kam mynjur ban ia pynjari ia kane ka jingiateh. Ki nongmihkhmat ka Sorkar Phareng bad ka Tibet ki la soi ia kane ka jingiateh hadien ba la pyntip ia ka China. Kat kum ka jingiasoi, kane ka jingiakut kan teh lang ia ki Phareng bad ia ka Tibet bad katba ka China kam pat soi ia ka kan nym ioh ia ki jingmyntoi jong kane ka jingiakut. Kat kum ka jingong jong u Richardson, ka jingduh ka China da kaba kam treh ban soi ia ka jingiakut ka long—

- (1) Ka jingpynkup bor ia ka China kum ka khlieh synshar halor ka Tibet da ki Sorkar Phareng bad Tibet.

- (2) Ka jingpdiang ba ka China kam dei ka hima bar ri bad ka jingpdiang ba ka Tibet ka long shibyanta na ka China.

Ki don kiwei kiwei de ki jingmyntoi ba ka China kan jin da la ioh lada ka la soi ia katei ka jingiakut.

Ka China pat ka don jingthmu da kumwei haba kam treh ban soi ia katei ka jingiakut, kata ka long ha ka jingmut jongka hi, ba ka don ka hok ban ia pynbeit hi tang bad ka Tibet ha la ka jong ka por. Ka China ka bat ia ka hok ka jinglong khl eh ia kito ki jaka ka Tibet kiba ka la duh noh hadien ka jingwan hiar thma u Chao Erh-teng khyndiat snem mynshuwa.

Kumta ia u pud hapteng ka Tibet bad ka China ym pat lah ban iapynbeit bad ka jingia-shut ka nang jur. Ka Tibet ka la lah ban beh ia ki shipai China shaduh ka wah Yangtse bad ioh knieh ia ki katto katne ki jaka la jong. Ka Tibet kan jin da la ioh lut ia la ki jong ki jaka kiba don ha ka Tibet ba shapoh kat kum ka jingpynbeit ha Simla lada ki Phareng kim shym pynsangeh da kaba byrngem ban nym ai tiar ialeh ia ka Tibet khamtam ki kuli jingsiat. Ia ka jingiakut sangeh ialeh la iasoi hapteng ka Tibet bad ka China ha u naiwieng ka snem shihajar khyndaispah khad-phra.

Ha u bnai July ka snem shihajar khyndaispah sawphewhynniew ka sngi shuwa ka sngi ban pynbna ia ka jinglailuid ka ri India na ka jingsynshar ki Phareng, ka Sorkar Phareng bad sorkar India ki la pyntip sha ka Tibet ia ka-

ne ka jingia aiti bor Synshar bad ba ia ki hok bad jingiadei kiba la ia soi hapteng ka Tibet bad ka Sorkar Phareng kat kum ka jingiakut kin neh naduh kane ka por hapteng ka Tibet bad ka Sorkar India. Ka Tibet kam shym jubab hynrei ka la sdang ban tap pud khlem da bat ia u pud ba la iasoi katba ka India kam shym jam palat shijam ruh na u Mc. Mohon Line.

Ha ka sngi shuwa ba ka India kan ioh ia ka jinglaitluid, la pynlong ia ka jingiakynduh ki ri baroh jong ka thain Asia kata ha ka snem shihajar khyndaispah sawphewhynniew. Ka lama Tibet ruh ka la poi ryngkat ryngkat bad ki lama ki ri ba laitluid. Ka jinglatang jong ki ri ka Asia ka kyrshan ia ka jinglaitluid ka Tibet naduh ba ka la beh ia ka China ha ka snem shihajar khyndaispah khadar. Ki nong Tibet kim don kano kano ka jing iadei ha ka rukom im, ka shonglang sahlang, ka ktien ka thylliej bad ki China, la ym lah ban len ba ki nong Tibet ki la nang shibun na ki China ha ka rukom ki jinglehniam, ki jingtbit ha ki kam trei kti hynrei ka rukom im bad ka pyrkhat pyrdain ki nong Tibet ka iasoh shibun eh bad ka jinglong mynsiem ne ka jingngeit Blei bad ki bud ia ka niam Buddhist, kata, ia ka rukom jingngeit ki nong India.

Ki China kiba ap khmang ia ka jingkut noh ka jingsynshar Phareng hadien ka jinglaitluid ka ri India, ki la phah ka shithi sha ka Sorkar Phareng ha India pyrshah ia ka jingbuh la ki ophisar India ha NEFA. Ka Sorkar India



hapoh ki Phareng ka la kyntait ia kane ka jingdawa ka China namar ka NEFA ka hap hapoh u pud ka ri India kat kum ki jingiapynbeit. Haden ba ka India ka la shimti ia ka jingsynshar lade, ka China ka la phah biang ia kajuh ka jingujor bad ka Sorkar India ka la kyntait. Ka Sorkar China ka la thaw sa da kiwei ki lad ban pynkulmar hynrei ha kane ka por ka Sorkar China Communist hapoh u Mao-Tsetung ka la knieh ia ka bor synshar ha China bad tur sha Peking ha u Kyllalyngkot laiphewwei tarik ka snem shihajar khyndai spah sawphewkhyndai. Ka Communist China ka sdang ban pynkhlañ ia u phud u pyrton ha ki jaka khappud Tibet bad pynbna lyngba ka Radio ba ka China kan pyllait ia ka Tibet na ki jingteh jingkhum bad na ka jingsynshar leh donbor bad jubor u Dalai Lama bad ba ki paitbah kin ieng pyrshah ia kane ka rukom synshar paitbah.

Ka Tibet haba la iohi ia kane ka jingma, ka la pynkhreh ia ki shipai iada ri bad ban wan rah tiar thma na shabar. Ha u September arphewhynniew tarik ka snem Shihajar khyndaispah sawphewkhyndai ki Communist China ki la knieh ia ka Sinkiang. Ha u November arphewsaw tarik Shihajar khyndaispah sawphewkhyndai ka Radio Peking ka pynbna ia ka khubor na u Mao Tse Tung sha ki briew ka Tibet ba kin knieh noh ia ka bor synshar na u Dalai Lama. Ha u December laiphew tarik Shihajar khyndaispah sawphew khyndai, hadien ka jingphet ka Nationalist Government ka China sha Taiwan, ka India ka la pdiang

ia ka jingsynshar ka Sorkar Communist ha China bad u Dr. K.M. Paniker u la-shimti kum u nong-mihkhmat ka India sha ka Sorkar Commuist ha China ha u bnai May Shihajar khyndaispah sanphew. Ka Sorkar Communist, China ka la pdiang ia u da kaba pyni ia ka jing-iajan bad ialong paralok. Pynban kane ka jing-pdiang ka India ia ka jingsynshar da ka Communist China kam ktah ei ei ia ka China kaba pyrshang ban kawang ktieh ia u Nehru da kaba kynnoh ia u kum u briew uba thrang ban leh jubor. La katta ruh ka India ka iai kyntu ia ka China ban iapynbeit ia kiei kiei da ka jingsuk. Ka India wat ha kane ka khew, ka wad lad ban iarap ia ka China ban pynrung kum ka dkhot ha ka United Nation.

Ha u Risaw hynniew tarik Shihajar khyndaispah sanphew ka China ka la hiar thma pyrshah ia ka Tibet. Ka India ka la phah ktien ha u Risaw arphewphra tarik shihajar khyndaispah sanphew ba ka jingpyllaît ia ka Tibet kan long da ki lynti ka jingsuk. Ka China ka la phah ka jubab ha u Risaw laiphew tarik, Shihajar khyndaispah sanphew ban pynshai ba ka Tibet ka dei ka bynta jong ka China bad ba ki jingeh ha Tibet ki dei ki kam pohiing jong ka China. Ki shipai Communist China ki dei ban rung ha Tibet, pyllaît ia ki briew bad iada ia ki pud ka China. Hadien bun ki jingeh ba ka Tibet ka iakynduh, kum ka jingbym ioh jingiarap na bar ri, ka jingbym pdiang ka China ia ki jing-iakut kiba mynshuwa ka la hap ban iateh jing-kular biang bad ka China. Ki iapynbeit ia ka

jingiateh kular ba ki sdang ha u bnai April  
 Shihajar khyndaispah sanphewwei bad kut ha  
 u May arphewlai tarik Shihajar khyndaispah  
 sanphewwei haba la iasoi ia ka jinglakut hadpeng  
 ka China bad ka Tibet. Ka jingiakut ka pyn-  
 skhem ba ka Tibet ka long ka bynta jong ka  
 China. Kumta ka Tibet ka la duh noh ia la  
 ka jingsynshar lade kaba ka la bat da ki spah  
 snem bad ia ka kvrdan jong ka ri kaba laitluid  
 naduh ka snem Shihajar khyndaispah khadar.

---

## **Ka India ba synshar hi bad ka jingladei bad ka China bad Tibet**

Hadien ka jingioh ia ka jingsynshar hi ne ka jinglaitluid na ka kti ki Phareng, ka ri India ka la sdang ban paw pyrthei hapoh ka jingialam ba radbah jong u Jawaharlar Nehru ryngkat bad kiwei pat ki Khraw pyrkhat ka ri India ha kiba la pynshet ia ki kam kiba pher ba pher.

Ka jingthmu ba kongsan ka ri India ka long ban tei ia ka ri da kaba iapynlong lok bad ki ri ka pyrthei baroh kawei khlem ka jingiateh ba-kyrpang bad kano-kano ka ri. Ka jingladei ka ri India ha ka por ba ioh ia ka jinglaitluid bad kiwei pat ki ri ba marjan kum ka China bad ka Pakistan ka long kaba bha bad ym don kano-kano ka jingma. Kumta ka jingpynap shipai pahara ha ki khappud ka India bad ka China kam shym long kaba 'skhem. Kawei pat, ym da idon eh ka jingsheptieng ba ka China kan lah ban wan hiar thma lyngba ki lum bah kiba jrong haduh khadkhyndai hajar phut bad ym da don eh kata ka jingpyrkhat ba ka China kan kwah ban tap jaka ha kine ki lum bah ki bym don kano-kano ka jingmih ne jingmyntoi. Hynrei ka jingwan hiarthma ba kyndit jong ki China ia ka ri India na ki thain shatei lam mihngi kata na NEFA ne Arunachal bad ban wan tur haduh palat ia ki kjat lum haduh Assam ka la long ka jingjah burom ia ka ri India kaba don ki shipai bad ki rangbah shipai kiba stad bad kiba shlur—kiba la ioh ka nam ha ka pyrthei baroh kawei.

Ka thma China-India hi ka la sdang tang na ka jingiaknieh ne jingiataap pud ha ki jaka ba ranab ka Thagla Ridge jong ka NEFA kata ha u pud Mc. Mohon, uba la ia pynbeit kat kum ka jingiakut ne jingia pynbeit pud ba kbot ka Simla boundary agreemeent hapdeng ka Sorkar India (hapoh ka jingsynshar ki Phareng) bad ka Tibet kaba arphewsaw bad arphewsan tarik u lher shihajar khyndai spah khadsaw hadien ka jingia-kynduh bad jingiapynebeit hapdeng ka China, ka Tibet bad ki phareng ha Simla ha u Risaw hynriew tarik shihajar khyndai spah khadlai.

Ka jingia kajia pud ne iaknieh jaka ka la mih nvngkong eh na ka jingiashut hapdeng ka China bad ka Tibet, haba ka China ka kwah ban long nongsynshar halor ka Tibet, ka jingkwah ban pynlar ia la ka khaii pateng da ki Phareng kiba bat ia ka jingsynshar ia ka ri India bad jing-bymshong suk ki thain Mongolia da ka jingwan tap pud ka Russia.

Ka India kaba dang ioh ia ka jinglaitluid kam lah ban ia ai reng pyrshah ia ka China ban iarap ia ka Hima kaba rit kum ka Tibet kaba don tang lai milion haba ka China pat ka don haduh hynriew spah milion ki briew. Ka long ka bym lah ruh ban mutdur kumno ba ka China kan tierg ia ka Tibet haba ki nong Tibet hi ki long k briew kiba wad tang ia ka jingsuk bad kiba im tang bad ka lehniam. Wat lada ka India ka don ka jingsngewlem ia ka Tibet, ka lah ban pyni ia kata tang da kaba kyntu ia ka China ban nym pyndonkam da ka bor. Ka long kaei kaei

ka bym lah hi ban pyrkhat ba ka India kan phah  
 shipai sha Tibet ban iada ia ka jinglailuid jong  
 ka Tibet pyrshah ia ka kynhun shipai China  
 kaba la lah ban pyndem ia ki shipai Amerika ha  
 Korea. Ka long kaba suk ia u Younghusband  
 ban lalam ia ki shipai Phareng sha Tibet ha ka  
 por u Lord Curzon ha ka snem Shihajar khyn-  
 daispah saw ban pyndem ia ka Tibet hynrei ym  
 ia ki shipai China namar ha katei ka snem ym  
 don shipai China ha Tibet. Kumta u Young-  
 husband u la shu thom pyrshah ia ki shipai  
 Tibet ki bym don ki tiar ialeh kiba biang bad  
 kiba khlem da ioh ka jinghikai ialeh thma bad  
 khlem nongialam. Wat la katta ruh la donkam  
 haduh shi Brigade ki shipai phareng ba u Young-  
 husband u lah ban ialeh pyrshah ia ki shipai  
 Tibet bad ban poi ha Lhasa. Kumta u Nehru  
 u iohi ia kane bad u wad ia ka lynti ban pynjem  
 da ki jingiaipyni bad jingujor jong u ia ka jing-  
 leh thombor jong ka China. Wat u General  
 Cariappa hi um mynjur ia ka jingphah shipai  
 India sha Tibet khlem pat ai ka jinghikai kaba  
 paka ia ki ban ialehha ki lumbah hapteng ka  
 jingkhriat kaba tasam pyrshah ia ka kynhun shi-  
 pai China kaba don haduh ar milion shiteng u  
 pyrton, kham palat ban ia ka kynhun shipai  
 Russia bad Amerika lada kheif lang. Ka long  
 pynban tang ban shu phah ia ki kum ki 'lang-  
 knia. Ka jingong u Bismark ban pynbeit ia  
 kiei kiei baroh da kaba iakren pyni hynrei ban  
 pynap da ki bayonet nadien lane ka jingong  
 jong u Mao Tsetung ba ka bor ka mi na ka  
 ktang suloi kim iahap hangne. U Pandit Nehru  
 u iohi bad sngewthuh ia kine kiei kiei baroh

bad ia ka jingthrang bor ka China ba kumta wat ha ka Durbar thaw aiñ ha u boai December jong ka snem shihajar khyndai spah sanphew u ong ba u snitorn jingmut ia ka jingthrangbor jong ka China. Ha kawei ka jaka haba la pan jingmut na u da ki katto katne, u jubab ba ka ri ka bym don ka kynhun shipai kaba khlaiñ kam don lad ha ki miej ka jingiakren ne iapyni nia.

Ha ka thma bah kaba ar, haba ki shipai Japan ki pyrshang ban rung sha India lyngba ka Manipur bad Naga hills bad wat la ia ka China la khang da ka duriaw, ki Phareng ki la ialeh katba lah ban pynbeit noh mar-mar ia ka jingpyniaid kaba thikna ia ki jaka rilum ha ki khappud. Kumta ka Sorkar ka la thung u Nongaituit (Adviser) ia u Lat Badonburom (Governor) ka Assam uba na ki daw ka jingbun ki kam um lah ban ioh por ban peit ia kine ki rilum bad ha ka snem shihajar khyndai spah saw phew lai la thung ia u J. P. Mills uba la don ka jingtip kaba biang ha kane ka liang. Shuwa ban kut ka thma ka Sorkar Phareng ka la sngew donkam ban pynpoi ia ka jingpyniaid Sorkar shaduh Tawang haduh u pud Mc. Mohon. Kumta ka paw ba ki Phareng ha ka por ka East India Company kim shym salia ban peit ia kine ki jaka khappud bad haba ka Sorkar Phareng ka la leit, ka la hap ha ka kti ka Sorkar India ban pynpoi ia ka jingpyniaid Sorkar sha kine ki thaiñ. U Sir Robert Reid, u Lat (Governor) ka Assam u la tyrwa ban thung ia u Ophiser uba lah ban sngewthuh ia ki jingthaiñ ba suhsat ki khappud

bad un shong ha Tawang ha ki por lyiur bad un trei ia kine ki kam :

- (1) Ban lum khajna kaba rit bad ban ai ia ki trai shnorg ba kin pyniaid ia la ki kam.
- (2) Ban ai ka jingkular ia kito kiba don ki khyndew ki shyiap ba ka sorkar kan ai jingiada ia ki.
- (3) Ban kular ia ka Tawang Monastery ba ha kaba thung ia u kblich duh ka Monastery, yn kynjoh ktien ia ka Tibet.

Ia ka jingai jingmut ban shim khajna bad ban khang ia ka jingshim khajna ka Sorkar Tibet hapoh u Mc Mohon line, ym shym la pdiang da ka Sorkar India ka bym kwah ban pynthut ia ka China. U Captain Lightfoot uba long u Political Officer ka Balipara Frontier Track, hadien ka jingleit peit jongu ia ka Tawang ha ka snem shibajar khyndai spah lai phew phra, u la ai jingmut ban pynlong ia ka Tawang Monastery ka Monastery ki Monpa bad ban shimti noh ia ka jingsynshar ia ka Tawang bad Dirang-tzong hynrei namar ba ka Sorkar kan hap pynlut bun bad ban nym pynthut ia ki Monpa, ka jingialang ki Political Officer ha Shillong ha ka snem shibajar khyndai spah sawphew, ka la rai ban nym shimti ia ka jingsynshar ia ka Tawang. Dei tad haduh ba ka Sorkar India ka la iobi ia ka jingpynkbreh ka China ka sa pyr-



khat ban shim ia ka Tawang. U Governor ka Assam, u Robert Reid u la mynjur ia ka jing-ai jingmut u rangbah dub ki shipai ban shim ia ka Tawang ban khang ia ka jingtur jong ka China na sha kine ki thain.

Ha u September arphew hynniew tarik ka snem shihajar khyndai spah sanphew khyndai u Pandit Nehru u la jubab ia ka shithi na u Chow Enlai kaba phra tarik ujuh u bnai ha kaba u Chow Enlai u la kynnoh ia ka India ba ka pyrshang ban pyinkhih thma ba ki khappud. U Pandit Nehru u la thoh ba u la lah iakren iapyni shaphang u Mc Mohon line bad u ha ka snem shihajar khyndai spah sanphew saw bad ha ka snem shihajar khyndai spah sanphew hynriew bad kaba mih nangta ka long sa tang ban pynshisha hangno une u Mc Mohon line u don. U Chow Enlai ha ka shithi jongu ha u bnai January arphew lai tarik ka snem shihajar khyndai spah sanphew khyndai u la pyrpaw ba u kwah ban kam haduh sawphew hajar sq. mile ka jaka kaba, ym don jingartatien, ka don shapoh u pud India da ki phew bad ki spah snem. U Nehru u kyntait ia ka jingkyndai u Myntri Rangbah Duh ka China ba ka India ka la iai thombor ia ka Sorkar China ban pdiang ia u pud ba la dawa da ka India. U Nehru u thoh ruh ba ka Sorkar India ka set barobor na ka jingtip ki paitbah ba ki shipai China ki iai tur shapoh u pud India bad ba ki la shna ruh ia ka surok Aksai Chin. Ia kane ka Sorkar India ka leh ban nym pyinkhih ia u paitbah pyrshah ia ka China bad kane ka la buh ia ka Sorkar India ha

ka jinglehraifā ha ka Dorbar Thaw ain bad ha  
 ka ri haba ki nong India ki la tip ia kine ki jing-  
 trei ki shipai China U Nehru u ong ba u pud  
 India bad Tibet u la don laslem bad la pynbeit  
 kat kum ki jingjia, ka jinglong ka jaka bad ka  
 rukom im ki briew ha kito ki jaka. U Nehru  
 u ong ba u bat ia ki iingiakut iateh baroh ba la  
 iapynbeit hapdeng ka Sorkar Tibet, ka Sorkar  
 China bad ka Sorkar Phareng. U Chow Enlai  
 u tyrwa ba kum ka jing iapynbeit kaba shipor,  
 ki shipai China bad ki shipai India kin ia kyn-  
 riah arphew kilometre na u Mc Mohon line.  
 Ka China ka pdiang ruh ia ka jingpyniad bad ia  
 ka jinglong khlieh ka Sorkar India ha NEFA  
 haduh u Mc Mohon line kaba ju long kumta  
 la slem bah bad ba ka China kan ioh long khlieh  
 ha ki katto katne ki bynta shatei mihngi ne  
 Ladakh. Ha ka jingshisha ym don pyrton India  
 ei ei ha ki jaka arphew kilometres na u Mc  
 Mohon line hynrei tang ki tarkarot pulit rah  
 suloi ne ki Assam Rifles. U Nehru uba la sha-  
 niah ia ki ktien u Chow En lai u la mad ia ka  
 jingkthang bad um shaniah shuh ia ki hynrei u  
 la ieng pyneh triang da kaba u la pynbna ha ka  
 snem Shihajar khyndaispah sanphew haduh san-  
 phew wei ba u Mc Mohon line u dei u pud ka  
 India lada u don ne um don ha ka map. Ka China  
 ka shu sngap naduh ka snem Shihajar khyndai-  
 spah sanphew haduh Shihajar khyndaispah san-  
 phew khyndai. U Nehru u la uxor ruh ia ka  
 jingdon ki shipai China shapoh u Mc Mohon  
 line ha Longju bad u tyrwa ba ka China kan  
 pynkynriah noh ia ki shipai jong ka na kane ka  
 jak bad ba ka India ruh kan nym buh shipai

hangue. Lada kumta yn nym don ka jingialeh hadien habud.

Ki China na ka por sha ka por ki pyrshang ban kynoi thiah ia ka India da kaba tyrwa ia ki kular kiba i dei khnang ba ka India kan nym suba ia ki buit arsap jong ka kiba ka iai pynkheĩn ia ki katba ka sngewmon.

Hadien ki jingioh jingtip ba ka China ka la pyrshang ban buh shipai ha ki pud bad ban tap pud shapoh ki jaka ba shapoh India, ka India ka la pynkhreh ha ka snem Shihajar kbyndai-spah hynriewphew ban pyniar ia ka Assam Rifles bad ban buh ki jaka ap pahara baroh shilynter u pud u bym don ka jingap pahara. Kane ka jingpyniar ia ka pyrton Assam Rifles ka shim por bad ha kaba kut u snem Shihajar khyndai-spah hynriewphewwei la lah ban ban buh ia ka Assam Rifles ha bun ki jaka. Ha kajuh ka por ka 4 Divisslon ka la pynlong Headquarter ha Tezpur. Kane ka Divission ka dei ka Brigade Command kawei ha Tawang bad kawei kawei ka Batalion ha Tawang, Dirang bad Bomdila. Ka China ka iai byrngem ia ka India bad ka don ka jingisyier ba lada ym lah ban buh shipai ha ki jaka jaka ki shipai China kin knieh ia kine ki jaka bad kan long kaba eh ban beh ia ki. U Prime Minister Jawaharlal Nehru u iai tohkit man ka por ia ki jaka kiba lait ba ka India ba la pynap pahara da ki shipai. Hadien ka jingia-kynduh jongu bad u Defence Minister, u Krishna Menon bad u heh duh ki shipai, ia ki jaka ba shong syier ha ka liang NEFA la phah pahara

da ki Assam Rifles. Ki Assam Rifles ki la poi haduh Dhola shaphang shathie na ka wah Nyam-kachu, tang khyndiat mile na Thagla Ridge, ka jaka ha pud sbak jong ka India bad ka Tibet. Khyndiat snem mynshuwa la don ka jingdawa ia kane ka ka jaka madan rud vah hapdeng ki ophisar ka India bad ka Tibet, bad ka Tibet ka la pynskhem ba kane ka jaka ka hap hapoh India namar ki jingri jong ki trai shnong Zemi-thang ha Tawang Sub-Division ki bam phlang hangne. Ha ka jingiakren ki ophisar India bad China ha ka snem Shihajar khyndaispah hynriew pbew shaphang ka jingiapynbeit ia u pud uba thikna, ki ophisar ka India ki la pyni ba ka Thagla ridge ka hap hapoh India

Ha u jylliew bad 'naitung ka snem Shihajar khyndaispah hynriewphewar la iohi ia ki rangbah shipai China ha ki thain Subansiri bad Siang ba ki wan ban syntiat ia ki jaka ban lah ban tur sha India bad ban knieh ia ka Nefa. Ka jingmut jongki ka long ba ynda ki la khmih ia ka Nefa kin sa ia pein bad katto katne ki jaka ha Ladakh. Kat kum ka jingioh jingtip ka India ha kane ka por, ki China ki don haduh hynniew Division kata kynthup ia ki pyrtan khap-pud Nepal. Nalor kine, ki don sa ki shipai pynap ha Stragatre, Lhasa, Chemdo, Nagdumba bad Gyantse, bad ki shipai kiba peit ia ka lynti syngkien. Kumta katkum ka jingkheih ki shipai China kin don haduh kumba khad-wei ne khadar Division ha Tibet.

Hadien ka jingshim ka Assam Rifles ia ka Dhola, ha ka wah Nyam Kachu, shathie na

Thagla Ridge ha u Jylliew bad Naitung shihajar khyndai spah hynriewphewar, ki China ki pynbna ha ki thain khappud Tibet ba kin sa jam ia ka wah Nyamkachu bad ~~boh~~ ia ki shipai India na kine ki jaka them bad na Tawang. Ki phah khubor ruh kylleng kylleng ba kin sam ia ki kynja rupa ha Tawang ha ki briew kiba duk. Ki la bthab wat ia ki briew ha Tsona, Tibet ban wad katno ki don ki briew kiba duk ha Tawang. Kane ka jingpynbna ka long tang ban ioh ia ka jingshaniah ki briew ha Tawang. Ka Thagla Ridge ka long u pud ka India bad Tibet hynrei ka China ka dwa ba ka Thagla ka long shatei na u Mc. Mohon line. La kumno kumno ka China kam pdiang ia u Mc. Mohon line.

Kat kum ka jingthoh jong u Lt. J. R. Saigal, ka kham shitom ia ka China ban wan pynpoi ia ki shipai ki swar haduh laihajar bad sawhajar kilometres sha ki khappud ka NEFA bad Ladakh bad ka bam ka di, bad ki tiar faleh. Ka China ka lah ban pynpoi tang khyndiat eh ia kine ki tiar ryngkat bad ki shipai bad kata ruh da ka jingeh kaba khraw bad kaba shimpur slem ban ia id lyngba ki lynti kiba kyllain ia ki lumbah. U Nehru hi haba u ong ban pynher krad ia ki shipai China u kren kum u briew uba tip shisha ia kine ki jingeh ki shipai China hadien ba u la pynshong nongrim ia kine ki jingeh kine ki jaka.

Ki nongthoh kiba la thoh shaphang ka thma China kynthup ia u Lt. General Kaul bad u

Brigadier Dalvi ki la pyrshang ban pynksan ne ban ai daw ba ki shipai China ki don ha ki jaka kiba kham bha ban ialeh ban ia ki shipai India. U Kaul bad u Dalvi ki iasoh kti bad ki nongiasaid thma bad ki kot khubor kiba kyrshan ia kane ka jingaidaw hynrei ka jingshisha katba pynshong nongrim ka long ba ki shipai jongngi ki don ki tiar kiba biang, ki briew kiba biang, ki jaka ialeh kiba bit kiba ki hi ki la jied bad kiba ki la tip bha nangno ban tur bad shano ban kynriah katba ki shipai China ki wan ban ialeh ha ki madan thma nongwei kiba kim tip bad ki tiar kiba ki kieng ha la ka met ryngkat ka jingbam ba ki rah ban bam ialade. Kawei pat ki shipai India hi ki la jied ia ka kut ban ialeh ha Sela haba ki la pyrkhata bvm lah pynkhih shuh ha kaba la pynpoi ki shipai kiba shlur tam bad ki tiar ialeh kiba kham donbor. Wat tang da ki khyndiat ki shipai hapoh u rangbah shipai uba shlur bad uba iest ri la dei ban pynher krad ia ka kynhun shipai nongshun kaba lah ban heh haduh san ne shiphew shah. Ka jingbym lah ki shipai India ban leh kumta ka don bun kiwei pat ki daw.

Ka China ha ka snem shihajar khyndai spah sanphewkhyndai ka la shna ia ka surok Tibet-Sinkiang bad bun ki surok rit khnang ba ka lah ban pynbiang ia ki jaka appahara ki shipai jong ka ha ki khappud. Ha ka liang ka Sorkar India pat wat haduh ka snem shihajar khyndai spah hynriewphew kam pat shym pyrkhata ban shna surok ban pynsuk ia ki shi-

pai ap pahara ha ki khappud lait tang ka surok Bomdila sha Tawang ba la shna da ka Border Road tang hapoh khadphra bnai.

Ha kaba sdang jong ka snem shihajar khyndai spah hynriewphew, U Nehru u la khot sngewbha ia u Chou En-lai sha Delhi ban ia kren iapynbeit ia ki kam khappud. U Chou Enlai u poi ha ri India ha ka khadkhyndai tarik u April bad ka jingiakren hapdeng u Nehru bad u Chou En-lai ka la neh haduh hynriew sngi. Hadien ba kim iapoi sha ka lynti pdeng shaphang ka kam khappud, la ziti ia ka kam ha ki rangbah Sorkar ba kin ia pynbeit khnang ba yn nym don kano kano ka jingialeh. Baroh arhang ki la iamynjur ban iapcit ia ki dular bad ki jingthoh jingtar kiba fadei bad kane ka kam khnang ban lait na ka thma. Ha ki jingiakren, la sngewthuh ba u Chou En-lai u la phah ki kyudon jingtyrwa sha u Nehru ba ka China kan pdiang ia ka jinglongtraf ka India ia ka NEFA da kaba ka kan sangeh shadien u Mc. Mohon line, lada ka India ka klor ban pdiang ia ka jinglong traif ka China ha Ladakh. Kane ka pynskhem ia ka jingdonkam jong ka China ia ka surok bah kaba ka la shna lyngba ia ka Aksai Chia.

Ha kane ka por u paid nong India bad ka liang iapyrshah ha ka ing dorbar thaw-añ ki la buh ia u Nehru ha ka jingeh kaba khraw. Wat ha ka por ba u Chou Enlai u don ha Delhi ka la don ka jingiakhif paitbah ba ka Sorkar kan nym pdiang ia ka jingtyrwa ka

China. U Nehru u la kular ba ka India kan nym ai wat shi inshi ka khyndew India ruh ia ka China.

U Mannekar, uwei na ki nongthoh kot khubor bad u briew uba tip bha ia ka saiñ pyrthei, ha ka kot jongu u pynpaw ba ka long kaei kaei kaba sniewbok ba u Nehru, ha kane ka por, un kyntait ia ka jingtyrwa jong u Chou En-lai — ka jingtyrwa kaba dei ban pyrkhat ban pdiang kat kum ka jinglong bad ka jing-iaid kiei-kiei ha kato ka por.

Ka jaka kaba ka India ka dawa ban ia-pynbeit ha Akai Chin kaba ha u pud Tibet-Ladakh ka la don lypa ha ka kti ka China. Ka India kan nym lah da lei-lei ruh ban knieh ia ka na ka China ha kane ka por ne hadien habud. Kum ban shu ong noh, ka China ka dawa ia kaei kaei kaba ka la lah bat ha ka kti. Ban siewdor ia kane ka jing-dawa jong ka China, ka China ka la kloia kane ka por ban pdiang ia u pud Mc. Mohon line.

Ka China kaba la shna ia ka surok bah lyngba ka Aksai Chin, kaba long tang kane ka lynti kaba lah ban poi sha Tibet, ka dei ban ialeh iap ialeh im ban ioh ia kine ki jaka bad ka la pynpaw ia kane ha ka shithi kaba ha u December arphewhynriew tarik shihajar khyndai spah sanphewkhyndai. Ka China ka la dawa ba kine ki jaka ki dei ki jong ka bad ba ka China ka la ju pyndonkam ia



kane ka lynti na Sinkiang sha Tibet. Ka jing-  
kyntait u Nehru ia kane ka jingdawa ia kine  
ki jaka, kaba ka China ka sngew ba ka don  
ka hok ban ioh bad kaba ka la ju pyndon-  
kam la bun spah snem, ka la pynbtiar ia u  
Chou En-lai uba la thmu hadien kane ban  
leh da kaba tyngesh ban pyndem ia ka India.

Hadien katei ka jingiakren ka India bad  
ka China, ka la don ka jingtap pud kaba jur  
da ka China kaba la pynmih ruh bun ki map  
ban pynshisha ia ki jaka kiba bun ha khap-  
pud ba ki hap hapoh ka China. Hadien ba  
ki jingiakren ki la pulom, ka China ka la  
thaw da kiwei pat ki lad ban ioh ka jingtip  
kaba bniah shaphang ki jaka pud bad ka  
NEFA. Ka la buh haduh khadar tylli ki jing-  
kylli kiba iadei bad ka Kameng bad kiba ka  
kwah ka jingpynshai bad kiwei pat ki jing-  
kylli kiba iadei bad ka NEFA—haduh ar-  
phewsan tylli bad ka India ka la ai jubab ia  
kine baroh. Kane ka la ai ka jingtip kaba  
thikna ia ka jinglong kine ki jaka khappud  
bad ia ka jingpynap pahara ia ki. Da kine  
ki jingtip kiba thikna kiba ka China ka la  
ioh na ka Sorkar India, ka China ka la trei  
kylla ia ka India hadien arsuen ha ka jingwan  
hiar thma jong ka. Kine ki long ki jingpynkhreh  
ka China suki pa suki katba na ki shispah khad-  
phra tylli ki jingpan jingshai jong ka India, ka  
China ka la jubab tang Sanphew khyndai tylli  
bad kita ki jubab ruh ki bym shai.

Ym tang ba ka China ka la wad ia kitei ki  
 jingshai da ki jingthoh, la report ruh ba ki  
 rangbah shipai China ki la wan haduh ki thain  
 Tawang bad Siang ban kylli na ki nongshong  
 snnong shaphang ka lynti, jinglong ki jaka ha  
 NEFA kaba mut ba ki la don ka jingpyn-  
 khreh kaba biang ban tur pyrshah ia ki shipai  
 na u Mic Miclon Line.

## **Ka Jingsdang ka Jingia- kynat bad ka China**

Ha u bnai November ka snem Shihajar khyndaispah hynriewphewwei, u Nehru u la phah ki jingbthah kiba thymmai sha ki shipai ha ki jaka khappud ka Ladakh bad NEFA. La bthah ia ki ban tur katba lah sha ki jaka kiba jan eh ia u pud. Dei ban leh ia kane khnang ban pynmih bun ki jaka ap pahara bad ban khang ia ki China ban pynkhlaia ia ki jaka ap pahara jong ki, wat ia kito kiba la don lypa.

Ha u bnai September phra tarik, Shihajar khyndaispah hynriewphewar, ki shipai China ki la jam ia u pud shapoh ki jaka India ha NEFA dang step phyrngap por ar baje shiteng bad ki la kerkut ia ka jaka shong ki shipai India ha Dhola, shaphang shathie na ka wah Namka Chu bad ka Thangla. Ki shipai India ki dang shu plie ia kane ka jaka ap pahara ha u bnai June kat kum ka hukum thymmai ka Sorkar ban tur shakhmat katba lah Ka Sorkar India kam lah ban shu sngap ia kane ka jingleh ka China bad ka jingkwah u paitbah ruh ka long ban ialeh pyrshah ia kane ka jingwan thombor ka China.

Ki bor ba hakhlieh eh jong ki shipai ki la hukum ia ka 9 Punjab Battalion ban tur bran bran sha Dhola. U Lt. General L.P. Sen u rangbah shipai ba ha khlieh duh ka Eastern Command u la iathuh ia u Khrishna Menon, u Minisrer ba peit ia ki kam iada ri ba ki shi-

pai China ha ki thañ Dhola ki don haduh hynriewspah ngut. U la dawa ba donkam la kumno-kumno shi brigade ki shipai khnang ba lah ban pynher ia ki China na Dhola. U ong ruh ba kan shim por ia kine ki shipai shi Brigade ban poi ha Dhola haduh shiphew sngi.

Ha u bnai September khadar tarik, katba ka Brigade Command kam pat lah ban poi, ka Sorkar India ka la hukum biang ban pynher ia ki shipai China na Dhola shisyndon. U Lt. General Umrao Singh, Corp Commander 33 bad u Maj. General Niranjan Prasad u Commander 4 Division, kiba la don bad bishar bniah ia ka jinglong ha kine ki jaka, ki la pynpaw ba kam long kaba lah ban leh kumta tang da ki khyndiat ngut ki shipai kiba don ha kine ki jaka bad ki bym biang ki tiar ialeh, ki bym ioh ka jinghikai kaba biang ban ialeh thma ha ki jaka lumbah kum kine bad ki bym shym la pynkhreh ialade pyrshah ia ka jingkhriat tasam kine ki jaka katba ki shipai China pat ki la pynkhreh janai ialade nadong shadong. U Lt. General Umrao Singh u la ai jingmut ba ka jingleit tur pyrshah ia ki shipai China kyrkieh kan long ka jingbakla kaba kbraw. U sngew dei pynban ba ki shipai India kin kynriah noh na Dhola bad ban pynskhem ia ka jingiada ha Tawang, khnang ba ki shipai China kin nym lah shuh ban tur palat bad ba lah ban pynher krad ia ki.

U Lt. Col. Misra, u rangbah ka 9 Punjab u la pan hukum kumno un leh lada ki shipai India ki lakynduh khuk ia ki shipai China

ha lynti sha Dhola bad la ai jubab ia u ba u dei  
 ban pynbor ia ki shipai China ba kin leit noh  
 bad ba um dei ban ai hukum ban siat laif sa  
 tang ban iada ialade lada ki shipai China ki tur  
 haduh kumba hynñiew phew san pruh.

Ha u bnai September khadsaw tarik, u  
 Rangbah duh ki shipai, u General P. N. Thapar  
 u la kdew pyrshah ia kano kano ka hukum da  
 ka Sorkar ia ki shipai India ban tur pyrshah  
 ia ki shipai China kum ka jingai hukum kaba  
 bakla haba ki shipai India kim biang nadong  
 shadong. U Lt. General Sen u Rangbah shi-  
 pai ba dei ia ka Eastern Command u sngew  
 kumjuh. Hynrei ka Sorkar India ka kwah ba ki  
 shipai India kin leh tyngoh noh klof ia ki  
 shipai China namar ka la don ka jingtynduh kaba  
 jur na ki paitbah.

Shuwa ba ka Brigade na Tawang, hapoh u  
 Brigadier J. P. Dalvi kan poi ha Dhola, la lah  
 pynbna ha Delhi ba ki shipai India ki la tur sha  
 Thangla Ridqe. Ha ka jingshisha ka Brigade na  
 Tawang ka poi ha Dhola ha ka arphew tarik u  
 bnai September.

Ki shipai China ki iai pyrta da ki tyndong  
 pyrta jengki kiba ki pynphai sha ki shipai India  
 da kaba ong—"Hindi-Chini bhai bhai Ye Jamin  
 hamari hai. Tum vapas jao". (Ki China bad  
 India ki ialong shipara. Kane ka dei ka jaka  
 jongngi—Khie leit noh). Hadien kata, la don ka  
 jingiasiat ba khlem sahngoh. U Brigadier Dal-  
 vi ha ka kot jongu u thoh ba ka China ka la

shukor ia ka India da ki 'jingleh buit jongka ha ki jaka khappud. Wat la ka ialeh ban mushlia bad kynshoit ia ki shipai appahara ka India ha ki khappud, ka kiar ban ialeh ha ki jaka ba jur ka jingiakajia bad ki shipai jongka ki kiar na kaba siat bad pynmynsaw ia ki shipai India. Kine ki jingleh jongka, ki pyngeit ia ka India ba ka China kan nym hiar thma ia ka India da lei-lei tang na ka daw ka jingbym iabeit pynbeit pud pynbeit sam. Ki jaka, kum ka Kharzemane bad Longju ha NEFA ki long ki jaka kiba ka China ka lehsian bha kumne. Pynban, u Dalvi u ong ba naduh ka snem Shihajar khyndaispah sanphew klyndai, ka China ka la pynkhreh ia la u phud u pyrton ban hiar thma ia ka India da kaba buh ki shipai kiba stad bha ban ialeh ha ki jaka lum bad ia ki tiar ialeh kiba biang. Ka India pat kam phohsniew ban leh kumta bad ka shu shanlah ha ki ktien ialong paralok

U Brigadier Dalvi, u Rangbah jong ka 7 Brigade uba kit khlieh ia ka jingialeh pyrshah ia ka China ha ki jaka ialeh ka Thangla Ridge, u thoh ha ka kot' jongu kumne—1) Ka China ka la khreh ban hiar thma ha ki thain Thangla naduh u bnai May Shihajar khyndaispah hynriewphewar. Ki la don ki uong Tibet kiba la rung lypa shapoh u pud ka India bad kiba trei surok ha NEFA kiba la iarap ban ai jingtip ia ka jingpyakhreh ki shipai appahara ka India, ia ki jaka ba pynap ia ki bad ia ka shong ka sah jongki baroh

2) Ka China ka la buh ki rangbah shipai kiba bha tam ban ialam ia ki shipai jongka.

3) Ka China ka la buh ki briew kiba nang  
ia ki kien baroh kiba kren ha India bad kiba  
tip bha la ka rukom im ki nong India.

4) Ka China ka la pyndonkam ruh ia ki  
nongshondur kiba bun kiba shon bad shim dur  
ia kine ki jaké baroh ba kan ioh ka jingtip  
kaba paka ia kine ki jaka kiba kan sa hiar thma  
bad ba kan nym don ka jingshitom ban tip ia  
ki jaka ba ki shipai jongka kin tur.

5) Ka China ka la pyinkhreh lypa da ki  
hajar ki kulai leit jingleit kiba ka la bsa ha ki  
jaka phlang haduh ka snem Shihajar khyndai-  
spah sanphewar. Nalor kine, ka la pyinkhreh  
ruh da ki hajar ki nongkit, kynthei bad shynrang.

6) Ka China ka la shna ki surok kiba ka  
lah ban phah ia ki tiar ki tar sha ki jaka khap-  
pud ha ka por kaba lyngkot bad ka la don ki  
sainar ai jingtip ne ki telephone line kiba bun  
shaduh ki jaka khappud.

Ka India pat kam don ka jingpyinkhreh lypa  
namar kam ju pyrkhath ban don kano kano ka  
jingialeh bad ka China Ka don ka jingneit  
kaba skhem ba yn nym don kano kano ka  
thma bad ka China katba dang im u Nehru.  
Ka India ka la shu pyinkhreh tang ban iada ia ka  
jingiatap pud ne jingiasiat tap jaka kiba mih teng  
teng ha u pud. Kaba phylla ka long ba wat haba  
la ioh ka jingtip ba ka China ka la pyinkhreh  
ban tur bad knieh ia ki jaka ka India ha NEFA  
bad ba u Menon hi u la kubur ba ka India ka la

dei ban leh tynggeh ia ka China, pynban ha kane ka por u Nehru u la mih ban leit shabar ri bad u wan phai ha u October artarik. Kumjuh ruh u Menon, u Minister Defence uba la dei ban leit sha ka General Assembly ka United Nation. U Morarji Desai, u Minister pisa tyngka ruh u la dei ban leit bad u Nenru sha London. Kumta ha kane ka por ki khlieh duh ka ri kim don ha la ri. U Nehru, ha ka por ba u mih biang na India sha Columbo ha u October khadar tarik ban wan phai ha ka khadsan tarik u la shu shaniah ha u Lt. General Kaul uba la thung ban peit ia ka jingiada ri ha ki thain NEFA. U Kaul ruh hi u don ha ka shuti haduh u October artarik.

Kane ka long ka jinglong ka ri India ha ka por ba ka China ka la sdang ban tangon tynggeh ha Thagla. Ym don jingpynkhreh kaba thikna ha kano kano ka rukom ruh.

Ka China ka la jied ia ka jaka faleh ha ki lum Thagla namar ka la pynkhreh janai ia la ki pyrton, ka la tip ia ki jaka ban tur bad ba ka lah ban pynpoi ia ki tiar ialeh bad ia ki jingdonkam jong ki shipai khambha ban ia kaba ka India ka lah ban pynkhreh namar ka India ka hap peit ia ki bun ki jaka pahara bad nalar kata, ka jingiarap kan wan tang raduh Tawang, ka jaka kaba jngai haduh saw sngi da ka kjat ban kiew bad hiar ia ki thiep bah. Ka la long ka jingbakla kaba kbraw ba ka India ka la bthah ia ki shipai ban ialeh ha kane ka jaka kaba kim da tip bha hynrei kaba ka China ka la spel lyndet.



**Ka long ka bym lah mutdur ruh kumno ba la af hukum ban ialeh ia ka China kaba don ka kynhun shipai ialeh madan kaba heh tam ha ka pyrthei.**

**U General Umrao Singh, Corp Commander uba la tip ia ki jingeh ki shipai India ban ialeh ha Dhola, ka jaka kaba them ha kaba ki shipai China ki lah ban siat na ki jaka kiba kham jrong, u la thoh na Tezpur sha ki bor shipai kiba kham halor hynrei u la ioh ka jubab na u General kumne—**

**a) Ka Headquarter Eastern Command ka la hukum ia ka kynhun shipai 7 Infantry Brigade ban khreh ban leit sha Dhola hapoh Sawphewphra kynta ban leh tyngeh ia ki shipai China hangto.**

**b) Khnang ban iada ia ka Tawang, yn buh ia ka kynhun shipai Sikh ha Bumla ban khang na ka jingwan tur ki China sha Tawang.**

**c) Ba ka kynhun shipai 9 Punjab kan leit bran bran sha Lumpu.**

**La ai hukum nalog kitei ba lada dei ba ia-kynduh ia ki China kyndit kyndit dei ban pynbor ia ki ba kin mih noh na ki jaka ka India. Lada ki shipai China kim kohnguh dei ban pyn-khreh ban ialeh khnang ban khang ia ki ban tur shapoh India. Ym dei ban siat lait tang ban iada ialade.**


**Kumta ka jingialeh ha Thagla ka la sdang da ka jingpynkhreh kaba shu malu mala bad ka-ba long ka daw jong ka jingjah burom kaba khraw ia ka ri India.**

---

## Ka Namkachu

Ka wah Namka ne Namkachu ka long ka lat-lat bah kaba tuid lyngba ki mawlong mawteh. Ha ka jaka kaba khim eh jong ka, ka jylliew haduh arphewsaw phut bad ka iar haduh shispah pruh. Halor kane ka wah Namka la pua saw tylli ki jingkieng ne ki Log Bridge bad ki shipai India ki buh sentri ban ap pahara ha kine ki jingkieng khnang ba ki shipai China kin nym lah ban jam sha shiliang. Ka jingialeh kaba jur ka long ban iaknieh ia kine ki jingkieng. Kane ka wah ka leit hap ha kane ka wah Ntamjang Chuka ba mih na Khenzemane bad tuid sha ki khappud Bhutan ha Bleting. Ka Namka Chu ka pynlong ia ka jaka them ki thiep Thagla bad Tsangdnar Hathingla. Ka mih na ki pung kiba don haduh khadsaw hajar phut bad ka noh haduh phra hajar phut. Ka Ntaniangchu pat ka leit iakynduh ia ka Tawang Chu shaphang shathie. Ka Tawang Chu ka iaaid na ki them jong ka Tawang.

U Brig. Dalvi u iathuh ba ka hukum ba u la foh hapteng phra bad arphew tarik u Risaw ba ka kynhun shipai 9 Punjab kan knieh ia ki jaka ba la dakhol da ki shipai China shaphang shatei mihngi na Dhola bad ban ker kut ia ki ha ki jaka kiba shathie na Thagla ka long kaba bakla namar ha kane ka por ka China ka la lah pynap haduh ar Company ki shipai sha shiliang ka Namka Chu bad shuh shuh kham sha pajih. Ki shi-





paſ India kim lah ruh ban thaw kino kino  
 ki lynti ban tur pyrshah ia ki shipai China  
 namar ki shipai China ki la don lypa ha ki  
 jaka ha kiba ki lah da kaba suk ban nang  
 iohi la ka jingpynkhreh ki shipai India bad  
 kat na ka jaka kaba ki shipai India kin tur,  
 ki shipai China kin shu kem suk ia ki. Ym  
 don ka jingpynkhreh kaba biang ia ki shipai  
 India ha kine ki thain. Ki shipai kim ioh ka  
 bam ka dih kaba biang bad kim don ki jing-  
 siat kiba lah ban ialeh bun sngi. Ki shipai  
 ki la shu wan sha kine ki thain kyrkieh bad  
 katto katne ki jingsiat kiba ki shu kieng halade.  
 Ym don kulai ne nongkit kiba biang. Ym  
 lah ban pyrkhath ba u shipai un lah ban rah  
 haduh katno ban iaid ia ki lumbah kiba ieng  
 haduh khadlai hajar san spah phut bad tam.  
 Ki shipai China ha kine ki thain ki la khreh  
 pura bad ki don ki jingsiat kiba pahuh bad  
 ki suloi kiba khlain.

Kat kum ka jingiathuh jong u Brig. Dalvi,  
 ki shipai ha Dhola kim don wat ki mohkhiew  
 ne ki wait bad kurat ban pom ia ki dieng  
 ba shna ia ka jaka rich, ne ki ing ap pahara  
 lane ki sainar shiah ne ki mine ban pynap  
 ioh wan tur u nongshun. U Dalvi u ong  
 shuh shuh ba ki shipai India kim don wat  
 tang ka shini ruh ban dih sha bad ki ia dih  
 da ka mluh. Kumno ki shipai India kin lah  
 ban pyndep ia ka hukum bala ai ba kin beh  
 ia ki China lada ki don ha kine ki jingeh?.

---

## **Ka Jingiasiat kaba sdang ha India**

Ha u September arphew tarik Shihajar khyndaispah hynrlewphewar, ki shipai China kiba ap pahara shaphang shathie na ka jingkieng kaba ar ha Namka Chu ki la kawang ia u jingpynbthei granade sha ka jaka ap pahara ki shi pai India tang khyndiat pruh. Ki shipai India ki la siat ia ki shipai China bad kane ka long ka jingsdang jong ka jingiasiat. Arngut ki shipai China ki la iap bad arngut ki la mynsaw. Ki shipai India sawngut ki la mynsaw.

Kane ka jingiasiat ka la long ka jingsdang jong ka jingpynkhreh baroh arhang. Ka jingiasiat hapdeng ki ar kynhun ki shipai kam dei shuh ka jingia kajia pud. Kane ka jingjla kan sa ialam sha ki jingjia kiba kham heh. Ym lah ban pynher ne beh noh ia ki shipai China na Thagla Ridge da lei-lei ruh.

Hadien kane, ki shipai India ka 9 Punjab ka la mih na Misamari ban pynkblaiñ shuh shuh ia ki shipai kiba ia don lypa ha Thagla. Ka jingpynpoi ia ki tiar ki tar bad ka bam ka dih ka long da kaba shu pynhap na suiñ da ki lieng suiñ ha ki jaka ba kham madan ka Serkhim bad ha kjat ka Hathingla Pass. Ki shipai India ki la lah ban ioh ia ki jaiñ bad ki tiar ki tar ban shna la ki jaka shlong ne ia ki jaka rich. Haduh ka arphew-tarik u Naillar ki shipai China kim shym tur pyrshah la ki shipai India.

Kane ka jingiaslat ka la pynkyndit byn-  
 riew ia ki heh khlieh ha Delhi bad ia ki  
 shipai rangbah duh namar kam dei shuh tang  
 ka jingiasiat pynher syrngiew hynrei ka la dei  
 ka jingia pynkhreh ia ka thma. U Menon  
 uba don ha ki jingleit shabar ri jongu u la  
 wan phai ban shimti ia ka kam kaba iadei  
 bad ka jingiada la ka ri pyrshah ia ka China.  
 U Krishna Menon u la ai jingmut ba ka por  
 ka la poi ban pynsangeh shisyndon ia kane  
 ka jingleh jubor ka China u da ai ka jing-  
 kyrmen ba ka India ka lah eh ban leh ia  
 kane. Ki Rangbah shipai ki la sdang ban  
 pyni ia la ki jingeh hynrei kim nud ang ha-  
 khmat u Menon.

Ha u October ar tarik shihajar khyndal  
 spah hynriewphewar, U General Sen u la iathuh  
 ia u Menon ba ki China ki la buh shi Batta-  
 lion ki shipai tang ha Thagla bad ba ki lai  
 ki Battalion ka India ki la don saphred ha  
 kine ki thain. U General Sen u la iathuh  
 ia u Menon ba ka jingpynkhreh ia ki shipai  
 kan shimpur haduh shiphew tarik bad kane  
 kan long ka sien kaba nyngkong ba ka India  
 kan pyndonkam ia ka kynhun shipai jongka  
 bad lada leh kumne, yn don ka jingia aireng  
 da ka kynhun shipai China. U Menon u la  
 ong ba ka jingthmu ka Sorkar ka long ban  
 pyni ia ka bor ka India hakhmat ka China  
 shwa ka tlang ha kaba yn nym lah ban phah  
 shipai namar ia ki lynti baroh yn sa tap da  
 ka ior.

U Nehru u la don ka jinglakynduh bad u General Thapar, u hehduh ki shipai bad u General Sen bad u la iohi ba ki artatien ba lah ban beh ia ki China. U Nehru u la kren shngaiñ ba u don ka daw kaba biang ban ong ba ka China kan nym leh ei ei da ka bor ia ka India. U sngew ba ka pyrthei hi ka pyrshah ia kano kano ka ri ban ialeh ia u briew uba wad ia ka jingsuk.

Ha ka lai tarik u October shihajar khyndai spah hynriewphewar u Nehru u la khot ia u General B.M. Kaul ban shimti ia ka kam kum u heh duh ki shipai ha ki thaiñ mihngi bad u la ong ba dei ban iapyneh katba don ka lad. U Nehru u kyrmen ba ki China kin sa pynshongdor hi bad kynriah na Dhola hynrei lada kim kynriah, ngi dei ban beh ia ki katba lah. Lada ym lah ban leh kumta, ka Sorkar kan duh ia ka jingshaniah ki paitbah.

Kat kum ka hukum ba la ioh ba ki shipai India ki dei ban beh ia ki shipai China na Dhola shuwa ka tlang, u Lt. General Umrao Singh u la thoh sha u Lt. General Sen, u Rangbah duh ka jingiada ia ka ri ha ka thaiñ mihngi kumne.

(a) Ban pynkbreh ia ki shipai India ban beh noh shisyndon ia ki shipai China na Dhola dei ban don haduh sanspah phraphewton ki jingsiat bad ban buh ia ki ha Tsang-dhar, ka jaka ba lah bau pynhap ia ki tiar donkam baroh na suiñ.



(b) Ki them rudwah Namkachu ki long kiba dap da ka maw suda bad kiba khim ban leit ban wan bad ki sañium palat. Ka jingtur pyrshah ia ki China nangne ka long ka jingiap iahade.

(c) Ki kynhan bym dei ban ialeh thma kim larkam ei ei ruh.

(d) Ki zongkit ba lah ban ioh, kata hapdeng lai bad sauspah kim biang satia ban pynkit ia ki jingdonkam ki shipai.

(e) Ka jingpynkit ia kiba mynsaw kan long ka jingeh ha kine ki thain.

---

## **‘Ka kynhun shipai ba kham heh—ka 4 Corps ha Tezpur’**

Khnanng ba lah ban ialeh pyrshah la ka China kaba la pynap shipai bun syrtap ha kine ki thain, u heh duh ki shipai u General P. N. Thapar bad ka Sorkar ki la mynjur ban pynmih ia ka 4 Corps ha Tezpur bad ban thung ia u Lt. General B. M. Kaul kum u Commander. Kane ka 4 Corps kan kynthup ia mynta hi kumba nynniew hajar ki shipai kata 5 bad 7 Infantry Brigade da kaba khmih lynti ba sa kawei ka Brigade kan wan hadien. Kumba ju long ka Corp ka dei ban don 6 haduh 12 ki Infantry Brigade. U General Thapar ha kane ka por u kular ba wat la ka don ka jingdawa shipai shilynter u pud na Ladakh haduh NEFA, un ialeh shitom ban pynbiang ia kane ka 4 Corps ha Tezpur kloï katba lah. Ka jingkwah u Menon bad u Thapar ka long ba u Corp Commander B.M. Kaul un beh noh shisyndon ia ki shipai China na ki jaka ka Dhola-Thagla.

U Corp Commander Kaul, hadien ba u la shimti ia ka kam, u la thoh ha ka kot jongu ba u la shem ka jingeh kaba khraw namar, nalor ki shipai, ka Corp Command ka donkam ki tiar siat kiba biang, ki Engineer, ki kali bad ki jingpynbiang ia ka bam ka dih. Donkam ruh ki nongtrei kiba bun kiba lah ban pyniaid, ki kam kiba bun kiba iasoh kawei ka section bad

kawei pat khnang ba ka jingpyniaid la ka Corp kan long kaba beit, ryntih bad ba stet ban trei kam.

U Commander Kaul u la leit khmih ruh ia ki jaka khappud dalade hi bad u la phah ka report sha ka Eastern Command kumne—

- a) Ba ka China ka la buh shí Brigade ki shipai ha ki thain Thagla.
- b) Ba ki tiar ialeh ki China ha kine ki jaka ki kynthup ia ki tup kiba khlain bad ia ki suloi ba siat bun synsiat.
- c) Ba ym lah ban nym ong ba ki China ki kham khlain bad ki lah ban pynliem ia ki shipai India.
- d) Ba lynda ym pynkhlain bad tei ia kine ki jaka klo katba lah, kan long ka jing-shaiong ia ka ri baroh kawei.

U Commander ka 4 Corp u Lt. Colonel Kaul hadien ka jingleit jugoh dalade ia ki jaka ha Dhola Thagla u la ion dalade ba ki shipai ki i heh mynsiem bad i shlur bha. U la iakynduh ruh ia ki Rangbah shipai kiba la don lypa ha kito ki jaka bad kiba peit ia la ki jong ki jong ki kynhun kata u Brig J. P. Dalvi Commander ka 7 Infantry Brigade, u Lt Col. Misra ka Punjab, u Lt. Col. Rikh ka 9 Rajput bad u Lt. Col. Ahluwana ka 1/9 Gurkhas. U la leit poi haduh ka kut tarkarot ha Dhola. Kane ka kut ap pahara ka don kumba khadar hajar phut bad la ker kut da ki jaka ap pahara ki shipai China tang kumba arhajar pruh ei ei. U Commander

Kaul u iathuh ba ha ka jingpeit jongu hi kane ka jaka kam long kaba bit ban ialeh ia ki shipai China. U lyngngoh lumno ba la jied ia kane ka jaka ban ialeh da u Lt. General Sen lene u Brig. Dalvi. U pyni ki daw balei ba kane ka jaka Dhola kam long ban ialeh pyrshah ia ki shipai China kumne---

- 1) Ki lynti ki long kiba eh bad ki bym biang nedong shadong bad ka long kaba eh ban leit ban wan.
- 2) Ka shah bha na ki jaka ap hi shipai China bad lah ban iola kyndiang ia ka jingpyn-khreh ki shipai India.
- 3) Namar ka jingbym bha ki lynti syngkien ya lah ban lum ia u phud u pyrton haba donkam ban leh kumta.
- 4) Ka wah Namkachu kaba iur ki lat-lat ka khang lad ban tur na sha kamat.

U Kaul u thoh ba wat lada ko Sorkar ka la ai hukum ban ialeh ia ki China nangne, u Lt. General Sen u la dei ban iapyrshah ia kane bad un jin da ai jingmut ban ialeh ia ki shipai China na ka jaka kaba kham bha.

Hadien kata, u Kaul u thoh ba u la pyntip sha ka Eastern Command bad Headquarter kumne --

- 1) Kaba bun na ki tier ba pynhap na suiñ, kum ka bam ka diñ, ki kuli bad ki jaiñ syaid ki hap ba ki jaka ki bym lait ban leit tam.

- 2) Ka bam kaba don bad ka kynhun shipai  
2 Rajput bad 1/9 Gurkha kan dap tang  
lai sngi bad tang sanphew syns'at ki kuli  
rit uwei uwei u shipai. Ki suloi heh ki  
dang don ha lynti.
- 3) Ki shipai kim don jaiñ syaid bad kine ki  
ar kynhun shipai ki phong da ki jaiñ  
phong lyiur bad shah ia ka jingkhriat ka-  
ba jur ha ki lum kiba khadsan hajar phut  
Don ruh ka jingduna ki juti boot.
- 4) Don ka jingduna nongkit kaba jur.
- 5) Ki nongtrei kiba la lum na kylleng ki  
Border Roads kin poi hadien katto katne  
sngi.
- 6) Donkam ki lie ng sjiñ kham bun bad kyr-  
kieh ban wanrah ia ki tiar ki tar kiba  
donkam.
- 7) Dang ialeh katba lah ban pyrshang ban  
beh in ki shipai China na kine ki thaiñ.
- 8) Ki shipai China kiba don ki lad bad kabu  
kiba kham bha ki lah ban dkhat ia ki  
lynti na kano ka liang bad kem koidi  
iangi.

Katba kitei ki rangbah shipai ki dang ia  
kren iapyrkhat ia ki jingeh kitei ki jaka, ki shi-  
pai China ki la siat na ka jaka kaba jan tang  
kumba hynriew spah pruh ne kaba la pynlong ia  
kine ki rangbah shipai ban phiet sha ki jaka riech.  
Hadien kata ym don jingsiat shuh bad kitei ki  
rangbah shipai ki la ioh ka lad ban bteng ia ka  
jingiakren. Khnang ban nym ailad ia ki  
shipai China ban tur shajan ka jaka ap ki shipai  
India ha Dhola, u Brigadier Dalvi u la lah phah

ia ki shipai jongu ha ka phra tarik u October  
ban buh ka jaka ap ha Tsengjong, shatei na ka  
wah Namkachu.

Ha ka khadwei tarik u October, u Com-  
mander Kaul u la iohpang bad la dei ban  
kit noh ia u na Serkhim da ka helicopter sha  
Tezpur bad na Tezpur sha Delhi. Ha Delhi  
u Kaul u la iathuh ia u Menon, u Nehru  
bad ia ki rangbah Sorkar bad rangbah shibai  
ia kaei kaba u la iohi dalade ha ki thain  
Dhola ba la don ka jingpynkreh ban ia-  
leh bad ka China. U Kaul ha ka kot jongu  
u thoh ba u la batai ia ki ia ka jingbymbit  
ki jaka ba ki rangbah shipai jong ka India  
ki la buh ia ki shipai India lynter ka wah  
Namkachu namar ka jaka ka long ka nurbah  
bad ka khim palat, kumta ba ym lah ban  
phet shane bad shatai ha ka jingialeh bad  
ba ki jaka kiba shajan nangne, kham shajrong,  
la bat da ki shipai China. U Kaul u iathuh  
ba u la kdew kumne—

- 1) Lada ngi tur ia ki shipai China, ha ka  
jinglong ba ngi don mynta, ngin shah  
pynrandien kylla. Namarkata, ngi dei  
ban kynriah noh na Dhola bad leit sha  
ki jaka kiba ngi lah ban faleh kham  
bha.
- 2) Kine ki jaka ha Dhola kin sa hap ior  
bad ngin nym lah ban pynbit pynbiang  
ia ki briew jongngi hangne.

- 3) Wat la ngi la pynkhreh katba lah, ki shipai kiba sha shiliang bad kiba la pynkhreh ia ki tiar ki tar kiba biang kin sloit iangi.
- 4) Ki China ki la lah ban pynkhreh kham bha namar ki don ki surok kiba ki la shna shaduh jan kine ki jaka ap paha-ra jongki.

Ki China ki don haduh 4 Division pyrshah ia ki shipai India ha Nefa haba ki shipai India ki don tang shi Division. Ki don ki tiar ialeh thma kiba thymmai bad kiba khambha ban ia ki jong ka India.

Kiei kiei kumba ki long bad kumba u Commander Kaul u la shem dalade u la pan hukum kumne—

- a) La u dei ban nang pynkhreh shuh shuh ha kine ki jaka bad ban tur pyrshah ia ki shipai China nalar ba ki ki don ki jingpynkhreh kiba kham bha bad ki shipai kiba kham bun bad ba ngin shu shah pynphai kylla.
- b) Lane ban pynduh noh ia ka hukum ban tur pyrshah ia ki shipai China hynrei ban bat ia ki jaka ha kaba ngi don.
- c) Lane ban wad ia ki jaka kiba kham bha shawei pat.

U Kaul u iathuh ba ki shipai ki kloi  
ban kohnguh ia kano-kano ka hukum.

U Nehru u la twad jingmut na u General Thapar bad u Lt. General Sen. Ki la mynjur ia ka jingtyrwa ban bat ia ki jaka ha kiba ki shipai India ki don hynrei ym ia ka jingtyrwa ban wad ka jaka pynkhreh iaieh da kawei pat.

U Nehru u la iathuh ia u Kaul ba lada kiei-kiei ki ieng pyrshah iangi, bad ba u Kaul kum u Commander uba don ha ka jaka u sngew dei kumta, ha ka jaka ba ngin tur pyrshah ia ki shipai China, ngin bat ia la ki jaka la kiba ngi don.

U Brigadier Dalvi ha ka kot jongu u pynrem ia kine ki jingai jingmut laitylli jong u Kaul ha ki rangbah ka Durbar thawain. U Dalvi u ong ba u Kaul u la shah ai jingmut bym dei. U ong ka don tang kawei ka jingjied kat kumba kiei kiei ki long ha ki jaka ba don ki shipai India ha Dhola ha kato ka por, kata ka long ban kynriah sha ka jaka kaba kham bha na kaba ki shipai India ki lah ban iaieh khambha kumba ma u bad u General Pierad ki la ai jingmut bad ba u Kaul hi u la mynjur. U la ai ka jingtyrwa kaba palat ia ka jingai jingmut jongki haba u ong ban pynkhlañ ia kane ka jaka ne ban bat ia ka jaka ha kaba ki shipai India ki don.



Ki China hi ha kane ka por ki don kawei ka Division kaba khelaiñ. Donkam la kumno kumno lai Division ban beh ia ki China kiba don shi Division kat kum ka jingkheĩñ ki shipai. Ym don jingkyrmen ba ka India ka lah ban pynhiar shipai na suiñ sha kine ki jaka kiba thmit bha, bym don ki jaka madan bad ki lynti iaid, ha Hathungla bad Karpola Pass. Kumta ka jingai jingmut u Kaul ban pynkhelaiñ ia ki jaka ialeh ha India ka long kaba bakla. Ban bat ia ki jaka ha kaba ki shipai India ki don ha Karpola ruh ka long ka jingai jingmut kaba bakla namar kine ki long ki jaka them bad ki shipai China ki don ha ki jaka bakham jrong. Ki shipai India kin nym ioh ka jingiada lane ka jingpynpoi ia ki tiar thma kiba biang. U Kaul u bakla ba lah ban bat ia ki jaka haduh khadar mile ka jingjngai khlem da ioh ka jingkyrshan da ka kynhun shipai kaba khelaiñ na shadien.

Ym lah ban shu kynnoh ia u Nehru ne ia kiwei pat ki rangbah saiñ pyrtnei ha Delhi. Lada pynkynriah ia ki shipai na ki jaka kiba ki la ju don u paitbah un khih. Wat haduh kane ka por ruh bun kiba dang shaniah hi ha ki ktien paralok ka China bad kim ngeit ba ka China kan tur pyrshah ia ki shipai India. U Kaul hi u la dei ban pyndonkam ia la ka bor ban bishar bniah ia kiei kiei hynrei um dei ban shu sngap ia ka jingai jingmut jong kito ki bym tip bad kiba shu mutdur ia kiei kiei na jngai, haba kane ka long ka kam iap kam im bad ka ijot jong ka ri.

U Brigadier Dalvi ha ka kot jongu u pyni ka jingpyrshah kaba palat ia u Corp Commander

uba, u thoh, u la ai hukun khlem da pyrkhat ia  
 la jingpvnkynriah ia ki shipai na kawei ka jaka  
 sha kawei pat. lyngba ki lynti kiba raieh raidam,  
 ban kiew ia ki thiep kiba jur ha ka jingkhriat  
 kaba tasam. U ong ba wat u Kaul hi u la iohi  
 da la ki klmat ia kine ki jaka bad ba u kubur da  
 lade ba ki long ki bym biang nadong shadong  
 ban pynkhreh ban tur pyrshah ia ki shipai China  
 kiba la pynkhreh thikna bha. U Dalvi u thoh  
 ba kum u rangbah shipai uba la ioh ka nari  
 bad uba u Nehru hi u la pynshet ia kane ka kanu  
 kaba khriw ban beh ia ka China na ki pud ka ri  
 India, u Kaul un jin da la ai ki jingmut ban pyn-  
 sngewthuh ia ki nongialam ka ri ba ka long ka  
 bym lah long ban beh ia ki shipai China lene  
 ban shong ap pahara ba kine ki jaka la Dhola-  
 Thagla. U hi u tip bad iohi da la ki khn at  
 bad nalar kata u la lah iakren iapyrkhat bad  
 kiwei pat ki rangbah shipai. Pynban u Kaul u  
 la phah ia ki shipai ban leit na Dhola post sta  
 Dhola lyngba ka Tsangdhar bad Kerpola I pass,  
 ki jaka kipa hapdeng khadsaw hajar sanspah  
 phut haduh khadhynriew hajar phut khlem ki  
 jam syaid kiba biang. Ym den ki jaka sah miet  
 bad ym den diengiap ban thang pynsyaid ne ban  
 shet ia ki jingbam jongki. Bun na ki shipai ki  
 la shuiap na ka jingkhriat bad wat kito kiba  
 poi sha ki jaka ban ialeh ki la tlot bad ioh pang  
 nalar ba kim ioh ka bam ka diu kaba biang  
 bad ka jingsyaid.

U Brigadier Dalvi hi u thoh ba lada u Com-  
 mander Kaul u la ong kam long ka jaka kaba  
 bit ban ialeh bad ba la jied bakla ia ka, balei ba

um ai jingmut ban pynkynriah noh ia ki shipai sha ki jaka kiba kham bit, kham suk bad na kiba lah ban ialeh kham bhe pyrshah ia ki shipai China.

U Major S. R. Johori ha ka kot jonou u thoh ba u Commander Kaul u la don ha Dhola bad u Divisional Commander palat saw sng b d u hi u iapyrshah ia ka jingjed ia kane ka jaka ban ialeh, balei ba um shym la ai hukum ia ki shipai India ban pynriah sha ki jaka kiba kham bhe ? Kane hi ia pyushisha ba ym don ki jaka kiba kham ba bad ka 7 Brigade ka la dei ban don hangne ban iada ia kine ki jaka ha Dhola-Thagla. Kam lah ban shu iehnoh ia kine ki jaka tang namar ba ki long ki bym biang ban ialeh. Ki don ki daw kiba kham khlain balei ba ki shipai ki dei ban don ha Dhola. U Major Johori u thoh ba ka daw ka long ban khang pyrshah ia ka jingtrei tyngheh ki shipai China na kine ki jaka.

Dei na kata ka daw ba u Commander Kaul u la myniur ia ka jingphah shipai u Brigadier Dalvi shatei na ka wah Namka Chu sha Tseng-jong kaba hap hapoh u pud ka India ha ka phra tarik namar lada ki shipai India kim shym la shim ia kane ka jaka ki shipai China kin buh shipai hangne bad kin ther ia ka jingkieng ap pabara ki shipai India ha ka wah Namka Chu. Pynban u Commander Kaul u thoh pat ba wat lada u kwah ban khang ia kane, um lah ban leh kumta namar ki shipai ki la lah leit kat ka kum ka kukum u Brigadier Dalvi. Nalor kata u

Commander Kaul hi u la hukum ia ki shipai 2 Rajput bad 1/9 Gurkha ha ka phra bad khyndai tarik October ban leit na Tsangdhar sha Dhola hadien ba u la pynkynriah ia ki na Lumpu ha ka san tarik Ha ka khyndai tarik u October u la ai hukum ba baron ka kynhun shipai 2 Rajput kan leit na Dhola sha Yumtsola ha ka shiphew tarik u October bad ban shong hadien ki shipai China. Kine ki jingai hukum ban phah ia ki shipai India sha ka wah Namka Chu bad ha ka shyntur ki shipai China ka long ka bym lah ban sngewthuh haba baroh aragut kitei ki rangbah shipai ki kubur ba ka Dhola kam long ka jaka kaba bit ban ialeh.

Kat kum ka jingthoh jong u Brigadier Dalvi, u Lt. General Kaul u khlei ia kitei ki jingiakren ha Delhi. U ong ba nalar ka jingshisha bad ka jingiapyini nia jongu ba ka jingpyndonkam da ka bor shipai kam long, um don lad da kumwei pat hynrei tang ban pyntur ia ki shipai ha ku shiphew tarik u October namar kane ka long ka tarik kaba khadduh ba la pdiang da ka durbar thawain, wat lada long kumno kumno ruh. U Kaul u iathuh ba u Rangbah duh ki shipai ha ka Eastern Command u la ai jingmut ban beh ia ki shipai China na kine ki thain ha Dhola-Thangla ha ka arphew khyndai tarik u September, hadien kata la buh por pat ha ka shitarik u October bad hadien kata ha ka san tarik u October Ka la don namarkata ka jingpyrkhat ha Delhi ia ki shipai India ki la shu shong kylli kti bad ba donkam ban phah da u (Kaul) ban pynkloi shaid shaid ban beh ia ki

China shuwa ba kan hap ior. U Kaul u iathuh ba ka ingdorbar baroh kawei ha Delhi ka la lyngngoh ia kane ka jingpynkylla por na kawei ka tarik sha kawei pat da ki shipai. U Kaul u ong ba dei ki rangbah shipai kiba la ialam bakla ia ka Sorkar bad ai jingkyrmen ba lah ban beh ia ki shipai China. U Kaul u ong ba ka jingbeh noh ia ki shipai China ka long kaba donkam kyrkieh eh wat lada ka ri India ka lah ban duh haduh arphewhajar ki jingim.

Namar kam long kaba jem ia u Kaul ban tur pyrshah ia ki shipai China ha Thagla, u la ai hukum ban pyntur ia ki shipai sha Yumsola, ka jaka kaba ym don ki shipai China. U Kaul u la ong ba kane ka jingpyntur ia ki shipai India kan pynhun ia ka Sorkar ba ki shipai India ki la sdang ban beh ia ki shipai China ha ka shiphew tarik u bnai October

Ki China hi ki dawa ba ka Thagla ka hap hapoh u pud jongki kat kum ka jingpynbeit ia u pud Mc Mohon line Nangne lan ban iohi ia ka jaka pynkhreh shipai ki China ha Le. Namar-kata sa tang ka kynhun shipai kaba palat ia ka bor ialeh kaba lah ban knieh ia ka jaka ha Thagla na ka kti ki China. U Dai vi u ong ba haba u pyni ia u Kaul ba don ka jingduna ki jaiñ phong syaid ban iada na ka ior ha kine ki lum thah, u Kaul u ong ba hynniew hajar sut kin sa poi na Canada. U Kaul u ong ruh ba ki suloi thymmai kin sa poi. Baroh ki tiar kiba donkam kin sa poi hadien ba ki shipai India kin poi hajan ki shipai China. Ka la i kum ka kam kai. Nangta

ruh, baroh ki rangbah shipai naduh Tezpur ki la poi lut haduh, kat kum ka jingthoh jong u Dalvi, la bun sa ki tupia saw suda bad i kumba baroh ki iawan ban iapeit ia ka jingialeh.

Kumta ka poi ka Akher ka sngi ship<sup>ew</sup> tarik u October ha ki shipai China bad ki shipai India ki la ialeh thma ha ki jaka khana payih na Thagla ha ki lum kiba haduh khadsan hajar phut ka jingjrong.

Kat kum ka jingthoh u Brigadier Dalvi, ka kynhua shipai 9 Punjab hapoh ka jingialam iong u Major Choudhury ka poi ha Tseng-jong shuwa ban kem iongre n ha ka khvnda<sup>u</sup> tarik u October. Hangne don tang kawet ka sem ap jingri. Ha ka por san baje mynstep ha ka sanphew tarik, ki shipai China ki la ther ia ki sanphew ngut ki shipai India kiba la leit sha Tseng-jong bad u Major Choudhury. Ki shipai China ki don haduh phraspah ngut bad ki tup ki man. U Major Choudhury u la pyntur shi section ki shipai sha Karpola II bad sha ki lum kiba jrong na kiba la ther ia ki China kiba la siat ia ki shipai India. Haden kane la don ka jingsangeh iasiat. Na ka hang ki shipai India, hynriew ngut ki la iap bad khadwei ki la mynsaw katba kat kum ka jingong ki China, haduh shispah ngut ki la mynsaw. U General Kaul haba u la iohi ia kane ka jingsiat ki China u la sngewthuh ba ki China ki kwah ia ka thma. La ong ba u la pynkit knlieh ia ka jingialeh ha u Brigadier Dalvi, uoa wat ha kane ka por, u dang iai ai jingmut ia u General Kaul ban fehnoh ia ka Namka

chu bad ban kynriah sha ki iaka kiba kham lah  
 ban iada hynrei u General Kaul um nud ban  
 pyndonkam ia la ka bor. U Kaul u la iohi  
 dalade ia ka jingialeh bad ia ka jingkhlaish ka  
 China kaba la pynkhreh ia ka jingialeh. Ha ka  
 jingshisha u la dei ban pynmih hukum katha u  
 sngewbit kum u General uba la don bad iohi ia  
 ka jingialeh hynrei ym ban ap ia ka hukum na  
 Delhi. Um nud ban ai hukum ban kynran dien  
 namar ioh u snah kynnoh bad u iai ban ba u dei  
 bau leh kat kum ka hukum kiba halor.

U General Kaul u thoh ha ka kot jongu ba  
 u la iohpang bad ha ka khadwei tarik u la ieh-  
 noh ia ka jingialeh ha u Brigadier Dalvi bad u  
 la mih ban leit sha Hathing La bad nangta sha  
 Sirkhmi. Na Sirkhmi u la her da ka helicop-  
 sha Tezpur bad na Tezpur sha Delhi. Shuwa ba  
 un mih na kine ki jaka ialeh ha Dhola, u General  
 Kaul u la ai ka hukum ha ka shiphew tarik,  
 nalor kiwei kiwei, lumne : -

- 1) Ia ka hukum ban beh ia ki nongshun  
 ynsangheh kaba pynjari tad haduh  
 ba un da wan na Delhi.
- 2) Ia mynta hi dei ban bat triang ia  
 ki jaka ha kiba ngi ngi don, kata  
 ha Namka Chu.
- 3) Ia ka jaka shatei na ka Namka Chu,  
 kata ha Tsang Le, dei ban bat kat-  
 kum ka jingai jingmut u General ka  
 kynhun 4 Division.

Lada u General Kaul un jin da la pynkynriah ia ka kynhun shipai 7 Brigade sha Lumpur, kane ka kynhun kan nym da la shah ker kut ha Namkachu.

Hi ka khadartarik u October, ki shipai ka 4 Grenadiers hapoh ka jingialim u Lt. Col Harikar Singh ka poi ha Namkachu. Kane ka long ka kynhun shipai kaba wan na ki jaka shit, khlem da ioh ka por ban pynbit ialade na ka bynta ban tur sha ki jaka khriat. U Dalvi u ong ba haduh kane ka por u la don arhajar sanspah ki shipai ban ialeh.

Ia ki shipai kiba la buh ha ki jaka khriat, kum ka Sela Pass, wat haduh mynta, ki da buh shuwa ia ki ha ki jaka ki bym da khriat eh bad hadien, suki suki, ynda ki la sdang ban lah shah ia ka jingkhriat ki sa phah ia ki sha ki jaka kiba khriat. Lym kumta ki shipai kin nym lah ban im ne bit ban ialeh. U Dalvi u iathuh ruh ba ha ka khadlai tarik ki nongshna surok Border Roads, kumba shispah sanphew ngut, ki la poi bad haduh khadhynriew tarik ki la don haduh sanspah sanphew ngut. Kine ki la wan khlem wan rah ka ham kaba biang bad khlem ki jaiñ syaid kiba lah ban iada ha ka jingkhriat.

U General Kaul u la poi sha Delhi ha ka khadwei tarik u October bad u la iakyn-duh ia u Nehru, u Menon, ki rangbah shipai bad ki rangbah shakri Sorkar. U la iathuh ia ki ia ka jinglong ha Dhola bad aijingmut ia ki kumne—



- a) Lada ki shipai India ki tur pyrshah ia ki shipai China kumba ka long mynta, ki shipai India kin shah pynher krad. U pyni ba dei ban pynkynriah noh ia ki shipai na Dhola sha ka jaka kaba kham bit ban ialeh.
- b) Yn sa hap ior ha Dhola bad kan long kaba eh ban bat ia kine ki jaka.
- c) Wat la ngi pynkhreh katno katno ruh ki shipai China bad ki jingpynkhreh kiba kham bha kin pynher krad ia ki shipai India namar ki don ki jaka shong kiba kham bha bad ki jaka ban ai jingiarap na shadien kiba skhem.

U General Kaul u la buh lai tylli ki jingai jingmut.

- 1) Lada ki shipai India ki dei ban tur pyrshah ia ki shipai China.
- 2) Lada yn weng noh ia katei ka hukum ban tur pyrshah bad ban pyrshang ban shu bat ia la ki jong ki jaka.
- 3) Lane lada yn kynriah sha ki jaka kiba kham bha.

U Kaul u thoh ba da ka jingai jingmut u rangbah duh ki shipai, U Nehru u la koh-nguh ban mynjur ba ha ka jaka ba ki shipai India kin tur pyrshah ia ki shipai China, ki dei ban pyrshang katba lah ban shu bat ia ki jaka ha kiba ki don.

Kitei ki jingai jingmut u General Kaul ki long kiba bakla. U la dei ban pynbor ban shah ba ki shipai India kin kynriah noh na Dhola sha ki jaka kiba kham bha namar u hi u la tip bad kubur ba ym lah da lei lei ban ialeh ia ki shipai China ha kine ki jaka.

U Lt. General Kaul ha ka kot jongu, u thoh ba u Nehru u iathuh ha ki nongai khubor ha ka khadlai tarik u October, shihajar khyndai spah hynriewphewar shuwa ba un leit sha Ceylon ba u la ai hukum ba ki shipai India kin beh noh shisyndon ia ki shipai China na ki thain Nefa kaba long khongpong ia ki jingai hukum jong u Lt. General Kaul ha ka khadwei tarik u October, shihajar khyndai spah hynriewphewar ba ha ka jaka ban ia aireng ia ki shipai China (namar ki shipai India kim don ka kabu kaba biang) ki dei ban ialeh ban bat ia ka jaka ba kaba ki don. Kane ka jingai khubor u Nehru ka lah ban pynioh ka daw kaba biang ia ka China, hadien habud ban ong ba ngi biar thma shuwa mangi. Lah ban ong ba u Nehru da kaba kren shlur kumne, u lah ban pyntieng ia ki shipai China ban tur pyrshah ia ki shipai India lane tang ban pynhun ia u paitbah. U Lt. General Kaul u thoh ba hadien ka jingiakren jongu bad u Nehru, u la phah ka hukum sha u rangbah shipai ka 4 Infantry Division ba dei ban nym kynriah na ki jingkieng ba ki shipai India ki ap pahara ha ka wah Namkachu wat lada long kumno-kumno ruh.

Ki shipai China ki la nang pynkhreh ia ka jingialeh da kaba kem koidi ia shibun ki pyrton shipai bad ki la tur pyrshah ia ka Yuwsola bad Karpola haduh Dum-dum-La. Nangne ki shipai China ki lah ban leit da kaba suk sha Thagla. U Brigadier Dalvi uba don ba kine ki jaka ha kane ka por u la pan bor ban pynkynriah nob ia ki shipai India sha Kumpur namar ki shipai China kumba arhajar u pyrton ki la pyrshang ban tur pyrshah ia ki shipai India ha Dhola.

Kat kum ka jingong jong u Lt. General Kaul, ki shipai China ki la tur pyrshah ia ki shipai India ha Dhola bad la don ka jingialeh paramet kaba jur bad ki shipai China ki la ryngkang ia ka wah Namka chu kaba ki shipai India ki la ialeh tyogeh ban khang bad ka jaka kaba la ap pahara bha. U Lt. General Kaul hi u ong ba kat kum ka jingiathuh da kito kiba la iohi da la ki khmat, u Brigadier Dalvi, u rangbah shipai uba dei ban ai hukum ha ka jingialeh hangto, um shym la pynkhreh ia kine ki jaka ialeh ha ka rukom kaba dei. La ong ba ym shym don ki thlew ne jaka rieh shipai kiba biang bad ki shipai India ki la shu rieh na u slap hapoh ki parashut ba la tap halor ki bniap. Ki shipai China ki la trei miet bad sngi da kaba pyndonkam da ki tiar kiba biang bad kiba lah ban pynstet ia ka kam. La katta ruh u Brigadier Dalvi u pyrshah ia ka jingkyinnoh u Lt. General Kaul namar u ong, lada ym shym la shna ki jaka rieh ne bunker kiba biang, baroh ki shipai India kin jin da la shah ha ka jingther ki suloi bad tup na ka

liang ki shipai China, bad ki jaka law bniap bashong ki shipai India kin jin da la bam ding. U kubur ba um don ki tiar kiba biang kum ki wait bad ki kurat ot dieng namar ym shym la lah ban pynpoi ia ki.

Ha ka khadkhyndai tarik u October, ki shipai China ki la pynkhreh bha ban ther ia ki shipai India. U Brigadier Dalvi u thoh ba ha ka miet khadkhyndai tarik ki shipai China ki la thang ki ding ban pynsyaid ialade baroh shimiet ha la ki jaka jaka na kiba ki la pynkhreh ban siat ia ki shipai India. Kane ka la pynduh mynsiem shibun ia ki shipai India kiba ym biang wat tang ki jaiu ban pynsyaid ialade. Ka kynhun shipai 7 Infantry Brigade ka la dei ban iada shilynter ka wah Namka chu kaba don haduh khadar mile naduh ka jingkieng kaba nyngkong haduh Tsangte. Ban pci na kawei ka jaka pynap shipai sha kawei pat, ka shimpur da ki sngi namar ki jingeh suda ban hap kiew ia ki lum kiba jrong bad hiar sha ki them kiba jylliew. Ki shipai India wat haduh kane ka sngi kim don ki sainar ban iada ia ka jingwantur u nongshun lane ki jingsiat kiba biang.

Ban pynkynmaw ia ki nongpule, don san tylli ki jingkieng ha kane ka wan Namka chu shilynter ha kaba ki pyrton India ki dei ban ap pahara na ka jingwan tap pud ki shipai China.

Ki shipai 1/9 Gurkha ar company ki la khreh ban leit sha Tsangle. Kawei ka company jongki Gurkha ka la lah leit sha Tsangle ha ka khadhyunniew tarik bad kawei ka don ha Tsang-

dhar. Ki shipai Rajput ki la ap naduh ka jingkieng kaba lai haduh ka Log Bridge. Ka kynhun shipai 9 Punjab ka la ap ia ka jingkieng kaba ar bad kawei ka Company ka la leit ban ap ia ka jingkieng kaba san ha Tsangle. Ki shipai 4 Grenadiers ki la ap ia ka jingkieng kaba nyngkong kumba ar Company duna. Kawei ka company ka la leit sha Nyamjang chu ha Khenzae mane. Kawei ka company ka don hapdeng Hathingla bad Serkhmi. Namar ka jingjingai jong ki jaka pynap shipai, ka long kaba eh ban lah ban phah ki jingbthah ne jingai hukum kiba biang sha ki shipai, khamtam hadien ka arphew tarik haba ki shipai China ki la dkhat lut ia ki sainar wireless.

Ha ka liang ki China pat, kata shatei na ka wah Namka chu, ki shipai China bad ka kynhun kaba la pynbiang nadong shadong ki ia kbreh na ki jaka kiba kham jrong. Ki tip ia ka jingduna jong ki shipai India ki bym shym la pynkhreh ialade namar, kumba la thoh da u Dalvi bad u Kaul, ki shipai China ki nang iohi kyndiang ia ki jingpynkhreh malu-mala jong ki shipai India.



## Ka Jingialeh Ha Namka Chu

Ha ka arphew tarik u October shihajar khyndai spah hynriewphewar, dang step, por san baje, ki shipai China kiba don ha pyrshah ka jingkieng kaba lai halor ka wah Namka chu, ki la pynher artylli ki ding kum ka jing-ai dak ia ki shipai China kiba la khreh ban ialeh pyrshah ia ki shipai India bad hadien kata la don ka jingsiat kaba jur da ki shipai China kiba la pyndonkam da ki suloi siat jngai kiba khlaiñ bha haduh ba la thaba ki lum Thagla da ka ding. Ki jaka ap jong ki shipai India, sha shilliang ka wah Namka chu, tang kumba shihajar kot ei ei na ka jingkieng kaba lai bad kaba saw ha ka wah Namkachu ha Tsangdhar, ka Log bridge bad ha ka Brigade Headquarter ki la hap ha u phria ding ka jingsiat ki shipai China. Ki China ki la pyndonkam da ki suloi 76mm bad 120mm kaba pyni ba ki la khreh bha ban ialeh da ka thma bad thom jubor ia ki shipai India kiba haduh kane ka por ki dang pyrkhath ban shu iada ia ka jingiaknieh pud bad ki bym shym la pynkhreh ka jingiada kaba khlaiñ, wat la ki heh duh ki shipai ki la iathuh shai ha ki kot kiba ki thoh ba ki la iohi da la ki khmat ia kine ki jingpynkhreh ki shipai China la bun bun sngi. Ka paw na ki jingthoh ba ka don tang ka jingbym ia sngewthuh jingmut bad ka jingbymnud ban pyndonkam ia ka bor wat haba ki la poi ha ka khim khait. Ka pynpaw hangne

ia ka jingkheĩn sting bad ia ka jingmatlah ban  
iohi na ka jingdem jong u phlang, shano ka  
lyer ka beh.

Ha Delhi. haduh kane ka por, ki khlieh  
duh kl-dang shaniah ha ki ktien khroh ka  
China ne ka China Hindi bhai bhai bad ki shah  
tynrah nadien ha ka China. Ki shipai China  
kim shym pynkhih ei ei ia ka kynhun ki shi-  
pai Punjah bad ki Grenadier kiba ap pahara  
ia ka jingkieng kaba nyngkong bad kaba ar  
namar ki thmu ban tangon tynggeh ha ki jaka  
ktem ha Dhola-Tsangdhar. Ki thmu ban poi  
haduh Lumpur bad kin sa shu ther ia ki shi-  
pai India ki ban wan phet iyangba ki lum ka  
Hathingla Pass. Nancta ki shipai China ki la  
ther ruh ia ka Khenzemane bad ia ki jaka shong  
shipai ha Zemithang khnang ba ki lah ban  
leit tur da kaba suk shaduh Lumpur-lyngba  
ki them jong ka wah Nyam Jang chu. Kane  
ka jingther ki shipai China ka la neh haduh  
shikynta bad hadien kata ki shipai China ki  
la tur. Ka jingialeh parakti ka long hapdeng  
ki shipai China bad ki kynhun shipai kiba rit  
jong ki Rajput bad ki 9 Gurkha.

U Brigadier Dalvi u thoh ba ka India ha kane  
ka por ka don haduh saw lak ki shipai hynrei  
tang hynriewspah ki la dei ban ialeh pyrshah ia  
shipai China ki bym duna ia ka arphew bazar.  
Kane kam dei shuh ka jingiaknieh pud hynrei  
ka dei ka thma Namka chu kaba la iasyriem ia  
ka thma Panipat bad ka thma Plassey.

Ki shipai ka 1/9 Gurkha kiba la dei ban leit sha Tsangle ki la hap ban ia khun ha lynti bad ki shipai China. Ki Gurkha kiba la pawnam ha ka jingialeh pyrshah wat ia ki shipai ba pawnam ki German, ha ka thma Cassiuo ha ka snem shihajar khyndaispah sawphewsaw, ki dei ban shah lehbein namar ka jingbakla ka jingpyniaid ia ka jingialeh da ki hehduh ne nongialam rangbah ki kynhun shipai India. Ka bym lah ban pyrkhath hi ba ki shipai India kin lah ban ieng bad ialeh ha ka jingkhriat kaba jur khlem ki jaiin syaid kiba biang bad khlem ki tiar ialeh ne ka jingpynkhreh shipai kaba biang. Ka jingialeh ka la shu long ka jingialeh ba satar khlem da don ka kynhun ialeh ba la pynbeit ryntih. U Brigadier Dalvi u thoh ba wat hadien ba u la pyntip sha u General Prasad uba shimti la ka jaka jong u Lt. General Kaul ba um lah ban phah ia ki shipai 1/9 Gurkha sha Tsangle namar lada ai kum, kata ka hukum kan long kumba phah ia ki ban shu tur ruma sha ki kuli ding ki shipai China, U General Prasad, wat ha kane ka khyllip mat, u dang ai hukum ban phah katto katne ki Gurkha namar u ong ba kane ka dei ka hukum kaba na khlieh tam. Kane ka pyni shai ba la shimti ia ka jingpyniaid ia ka thma da ki heh khlieh ki bym dei ki rangbah duh shipai. Kumta ka mih ka jingbymlah ban ialeh ia ki China haba ki nongialam pyrton ki tip ba la pyniaid ia ka thma da kita ki bor ba ha khlieh tam bad ym dei da ki rangbah nongialam pyrton.



Ki shipai China ki la tur ruh sha Hathingla ban khang ia ki shipai India kiba pyrshang ban kynriah na ka jingkieng kaba nyngkong bad kaba ar ha ka wah Namka chu Ha ka juh ka por ki shipai China ki la tur sha Tawang na ki them ka wah Nyam Jang chu. Kawei pat ka kynhun shipai kaba heh ka la hiar na Bumla ban tur sha Tawang na shaphang shatei. Kumta ki shipai China ki la tur sha kylleng ki jaka na ka Kameng bad ki la kerkut ia ki shipai jong ki. Hadien ba ki shipai China ki la pyndkut ia ki sainar wireless, ki shipai India ki la kulmar namar ka la duh noh ka jingphah hukum na ki rangbah shipai. Ki shipai India ki la sdang ban ialeh tynggeh hapoh ka jingialam ki rangbah shipai kiba kham rit bad kim ai jem ia ki shipai China wat la ki la shah ker kut.

U Brigadier Dalvi u thoh ba ki shipai India kiba la pynap la ka jingkieng kaba saw ha Namka chu hapoh ka jingialam u Lt. Colonel Rikh ki la ialeh tynggeh pyrshah ia ki shipai China haduh ba ya da pynduh ia ki jaka shong ialeh jongki bad ba la pyniap ia ki shipai ai signal bad ia u Captain Mangar. Kawei pat ka kynhun shipai India jong ki Bengali hapoh ka jingialam u Jamedar Biswas ka la ialeh tynggeh bad tur da ki wait suloi haduh ynda la siat lut ia ki bad ia u Jamedar Biswas. U Major Singh uba la lum ia ki shipai India katba u ioh, u la ialeh tynggeh ban tur pyrshah ia ki shipai China. Ha kane ka jingialeh ki China ki la pyniap shibun na ki shipai India bad u Major Gurdial Singh u la shah kem. U Brigadier

Dalvi u thoh ba haba ki shipai India kim lah iakyrshan shuh, bad ki kut ka jingialeh ki la kyllon kawei hadien kawei, u Lt. Col. Rikh u la bat skhem ia la ka kut ryngkat bad ki shipai India ba satar-u Captain Bhatia, u Lt Bhup Singh bad u nongbud jongu. U Dalvi u thoh ba ki China ki la ther da ki machine gun ia ka kut ba don u Lt. Col Rikh bad ki briew jongu hynrei kim lah ban pyndem ia ki tad haduh ynda uwei na ki shipai China u la par sor bad bret da u handgrenade. Hadien kata u Captain Bhatia u la iap bad u Rikh u la mynsaw jur. Ki shipai China ki la kem ia u Rikh u bym tip briew shuh bad ia u Bhup Singh.

U Brigadier Dalvi u iathuh ruh shaphang ka jingshlur ki shipai Rajput hapoh ka jingialam u Suludar Darath Singh kiba la ialeh haduh kaba kut wat la ki la sah sa tang hynniew ngut. Kumjuh ruh ia u Jamedar Bose uba la tur da ka wait suloi bad aiti ia la ka jingim. Shaphang u Major B. K. Pant, u Dalvi u thoh ba ka jingshlur jong une u rangbah shipai ka long kaba palat. Haba ki shipai China ki la ther ia ki shipai India—ki Rajput, u Pant u la leit sha uwei pa uwei u shipai ban kdup bad ai mynsiem ia ki da kaba oug ba kane ka dei ka sngi ba ki shipai Rajput kin pyni ia ki shipai China ia ka jingshlur bad ia ka jingkohnguh ki shipai Rajput. Wat haba u Pant u la shah siat na ka kjat, u par iaiap ban pynshlur ia ki shipai ba kane ka dei ka jingialeh haduh ban da iap lut bad haduh u kuli uba khadduh. U Brigadier Dalvi u thoh ba u Major Pant u la shah siat baroh artylli ki kjat

bad na ka kpoh hynrei u lai pyrta ban pynshlur ia la ka kynhun shipai Rajput kiba la pynher krad ia ki China haduh sawsien. U Pant u la pyrta—"Phi ki shipai Rajput Regiment, la kha iaphi ban iap namar la ka ri. U Blei u la jied ia kane ka wah Namka chu ha kaba phi phi dei ban iap. Ieng bad ialeh kum ki Rajput". Haba ki China ki iohi ba dei u Major Pant uba la ai mynsiem ia ki shipai Rajput ban ialeh, ki la siat bun kuli ia u bad u la iap. Ha kane ka jingialeh ba shyrkhei ka kynhun shipai u Major Pant kaba shispah khadar ngut, ka la duh noh phraphewar ngut kiba iap bad kiba mynsaw.

La ong ba ka China hi ka la kubur ba ka la duh shibun ki shipai ha kane ka jingialeh ha NEFA bad ka jugduh kaba bun eh ka long ha ka jingia aireng bad ki shipai jong ka kynhun 2 Rajput. Ki shipai Gurkha ruh ki la ialeh tynggeh bad pyni ia la ka jingshlur hapoh ka jing-ialam jong u Lt. Col. Ahluwalia uba la mynsaw bad shah kem. Ki shipai Punjabi kiba la dei ban ialeh naduh ka khadsan tarik u September bad ki bym ailad ia ki shipai China ban tur pyrshah, ki la iap bad mynsaw lut ha ka por ba ki kynran na Hathingla Pass bad na ki lum Dhola. Kumjuh ruh ki Grenadier. Kine ki arkynhun ki shipai ki la shu shah pyniap khlem da ialeh namar ka jingbakla ki nongialam rangbah. Ki shipai Punjabi bad Gurkha ha Tsangle kiba la shah byrngem ha ki shipai China ki bym lah ban iada ialade ki la phet lyngba ka Bhutan bad ki la lait.

Ha ka por phra duna shipawa mynstep, ki shipai China ki la rung ha ki jaka shong ki shipai India ha Dhola hadien ba ki shipai Gurkha ki la kynriah shaphang Tsangdhar. Ki shipai Rajput baroh ki la iap lut. Hadien lai kynta, ar battalion ki shipai India ki la shah kerkut bad kyllon khlem lah ban leh ei ei hynrei ki la iap kum ki riewshlur, kata, ka kynhun shipai ki Gurkha, ki Rajput, ki Sikhs, ki Dogra, ki Bengali, ki Musulman jong ki Grenadier, ki Apel bad ki South Indian Na kylleng sawdong ka ri India kine ki shipai ki la ialeh bad ai ia la ka jingim ban iada ia ka ri.

Ki shipai China kiba la sdang ia ka jingsiat jongki naduh san baje mynstep ha ka arphew tarik ki la tur sha ki thain Tsangdhar ha ka por khyndai baje mynstep, ki da ia id lyngba ki jaka ap pahara ki shipai India ha ka jingkieng kaba san bad kawei pat ka jingkieng ba shna malu mala. Ka Tsangdhar kaba la dei ban pynkhlain ka jingap shipai naduh ka shiphew tarik u September, namar ka long ka jaka kaba ki shipai China ki lah ban rung shapoh u pud India bad ka jaka kaba pynhap ia ki jingdongkam ki shipai na suiñ, hynrei ha kane ka por don tang khyndiat ngut ki shipai bad ki nongtrei office. Ha ka step arphew tarik, ka helicopter kaba wan ban peit ia ka jingialeh ha ki jaka ka la shah siat. Kane ka mut ba ki briew kiba peit ia ka jingphah liengsuiñ kim shym ioh jingtip ba la don ka jingialeh kaba jur ha kine ki thain, lym kumta la dei ban pynsangeh ia ka jingwan jong kane ka helicopter. U nongniah kane ka

liengsuin u Flight Lieutetnant Seghal bad u Major Ram Singh ki la iap. Hadien ka jingwan tur ka kynhun ba khlaif jong ki China sha kine ki jaka them ka wah Namka chu, u Brigadier Dalvi, u rangbah ka kynhuh shipai 7 Brigade, hadien ka jingai jingbit u General Prasad, u la mih ban leit sha Tsangdhar ban lum ia ki shipai ban ialeh hangne hynrei shuwa ba un poi ha Tsangdhar ki shipai China ki la rung bad bat ia ka. Kumta ka jingialeh ha kine ki jaka ha Kameng, ha Namka chu bad Thagla Ridge ki la kut bad ka jingiaiap ki shipai kaba jur baroh arliang.

U Lt. Col. J. R. Saigal ha ka kot jongu u thoh ba ym lah ban ai ka jingtip kaba thikna bha shaphang ka thma ha Namka chu namar u ong ym shym la don ka jingialeh kaba la pynkhreh bha da ki shipai India ban ialeh ia ki shipai China haba ki wan ban tur ha ka arphew tarik u October shihajar khyndaispah hynriewphewar. U lyngngoh ia ka jingshahkem u Brigadier Dalvi uba long u rangbah duh jong ka kynhun shipai 7 Brigade haba kiwei pat ki rangbah shipai ki la lah ban lait bad ban phet noh. U ong ba wat u Brigadier Dalvi um lah ban pynshai ia ka thma Namka chu. U Lt. Col. J. R. Saigal u pynpaw ia ka jinglyngngoh kaba khraw kumno ba u Dalvi un shu pynshong ia ki laihajar ki shipai jongu kum ki han ha ka pung ban shu shah siat kai ha ki shipai China. U thoh ba haba la pynkylla ia ka hukum ba ki shipai India kin tur pyrshah ia ki shipai China da ka hukum ba ki shipai India kin shu iada lalade

ha ka jaka kaba ki don, u Brigadier Dalvi un jin da la pyndonkam ia la ka bor ban pynkynriah ia ki pyrton jongu sha ki jaka kiba kham bha, haba ma u hi u la iaiban ba ka jaka ka long ka bym long ban ialeh. U Brigadier Dalvi hi u la ong ba u la iohi ia ka jingpynkhreh hiar thma ki shipai China naduh khadar haduh khadkhyn-dai tarik. Ka jingwan tur ki shipai China kam shym long kaba khlem khmih lynti. U Brigadier Dalvi katha ka paw na ka kot jongu, u la shu shah ha ka jingpyniaid u Corp Commander Kaul uba thish pang ha Delhi bad u Divisional Commander Sen bad um don mon ban ialeh.

U D. R. Manketan ha ka kot jongu u thoh ba kiei kiei baroh ki iaaid bakla ha ka thma ha Kameng. Ym don ka jingpyrkhat bniah ne ka plan kumno ban ialeh ia u nongshun. Ia ki rangbah shipai la iai pynkylla man ka por ha ki jaka ialeh. La don ka jingkhñium ia ka jingtuklar eh jong ka Sorkar kum ha kaba phah shipai na kawei ka jaka sha kawei. Natorkata, ki khñium ia ka jingioh ia ki hukum kiba iai kylla man ka por na u hehduh ki shipai na Tezpur. U thoh ba ka Sorkar ka la jied ia ka jaka kaba bakla ban ia aireng bad ki shipai China ha Dhola. Ia kane la leh pyrshah ia ka jingai jingmut ki rangbah shipai. Ka Sorkar ka la jied ia ka por kaba bakla ban phah tur pyrshah ia ki shipai China, haba la tip biang biang ba ka ri India kam pat la lah ban pynkhreh ki shipai kiba biang ban ia aireng ia ka China. U thoh ruh ba haba ki shipai China ki la tur pyrshah ia ki

shipai India ha Dhola ha ka arphew tarik,  
 ka India kam don ki shipai kiba biang ban  
 ialeh ia ka kynhun shipai China kaba heh bad  
 ba ki shipai India kim ioh ka bam ka dih  
 kaba biang, kim don ki jingsiat kiba biang,  
 ki juti kiba biang, ki jañ syaid kiba biang  
 bad ki suloi kiba khlaiñ. Katba ki shipai  
 China ki ialeh da ki tiar kiba thymmai bad  
 kiba donbor, ki shipai India pat ki pyndon-  
 kam da ki suloi 303, ki suloi kiba la rim bad  
 kiba la dei ban nym pyndonkam shuh. Haba  
 ki China ki la ther ia ki shipai India, ki  
 bapli ki shipai India kim don ki nongialam  
 namar u nongialam ba rangbah duh, u Kaul  
 u don ha Delhi ba u pang. U Manketan u  
 thoh ruh ba wat hapdeng ki rangbah shipai  
 ba don ka jingbym ia sngewthuh jingmut bad  
 ka jingiashut. U thoh ba katba ka China ka  
 la wanrah haduh saw Division ki shipai ha  
 ki pud NEFA, ki shipai India ki don  
 duna wat shi division ruh. Ka India kan jin  
 da la pyndonkam da ki liengsuiñ ban ialeh  
 ha kine ki jaka kiba shitom kumba ka la leh  
 ha ka thma Pakistan haba u Shastri u la  
 phah da ki lieng suiñ ban ialeh ha ka Chhamb  
 Sector hynrei ka India ka tieng ban phah da  
 ki shipai suiñ namar ioh ka China ruh kan  
 leh kumjuh, hynrei u Manketan u thoh ba  
 ka China kam don hi ki liengsuiñ kiba biang  
 ba ka lah ban ialeh ha kine ki thaiñ. Kane  
 u ong, ka long ka jingduna ki nongwad jing-  
 tip na ka liang ka India. La ong ba ki tiar  
 ialeh kiba bha ki don ha lynti na Tawang  
 katba ka jingialeh ka la sdang ha Dhola bad

ba ki China ki la pyndem ia ki shipai India.  
Kumta ia ki tiar ialeh kiba bha la hap rah  
kylla noh sha Tawang.

Namar ba ym don surok sna kine ki thain  
la hap ban shu pynhap ia ki jingdonkam ki  
shipai India da ki liengsuiñ bad bun kine ki  
tiar ki hap sha ki riat bah kiba ym lah ban  
leit shim bad haba dei ki hap sha ki jaka ki  
nongshun. Katba ka China pat ka la shna ki  
surok kiba bha haduh u Mc. Mohon line bad  
ka lah ban pynpoi wat ia ki kali shipai kiba  
heh. Ka Le, ka jaka pynkhreh shipai ka jngai  
tang shiphew mile na ki jaka ialeh katba ka  
jaka pynkhreh shipai ka India kaba jan tam ka  
long ha Tawang kumba hynriew phew mlle  
na ki jaka ialeh.

Ka long ka jingshisha ba ki shipai India  
ki la duh jingkyrmen lypa namar ki la tip  
ba la ai ia ki ka kamram kaba kin nym lah  
ban leh, la ki la leh ia kaba ki lah bad ki  
la aiti ia la ki jingim tang na ka daw ka  
jingbakla ki khlieh duh.





## **Ka jingkyllon ka Tawang, Tsela, Dirang Tsong bad Bomdila**

Ki shipai China, naduh ka arphew tarik u October, ha ka sngi ka jinghiarthma jongki ia ki Dhola, ki la tur sha Tawang na ki them ka wah Nyamjang chu lyngba ka Khenzemane. Ka kynhun shipai kaba kham heh pat ka la tur sha Tawang, na shaphang shatei, kata na Bumla Pass haba ki shipai India kim poi pyrkbat. Ki shipai China ki la sdang ban shna ia ka surok na Bumla sha ka shnong Chow ha Tawang halor ka surok ia id kulai ban pynlong ia ka ka surok motor bad da kane ki lah ban wan rah ia ki kali shipai kiba heh naduh Tsona haduh Tawang. Hapoh artaiew, ki shipai China ki la pyndep ia kane ka surok ryngkat ka jingiatrei lang ki Engineer kiba nang ban shna surok ha kine ki lum bah kham bha ban ia ki briew ka India. Ka jingthmu ka China ha kaba shna ia kane ka surok ka long ban pynhiar shipai bad ki tup ki man kiba biang haduh Tawang bad nangta ban tur shuh shuh sbakmat.

Ka India ka la lah duh lypa ia ki sawtylli ki battallion ha ka thma Dhola bad ia kiwei pat ar Batallion, kata ki shipai jong ka Sikh Light Infantry bad Garshwal Rifles kiba la buh ha Tawang ban iada ia ka, la pynkynriah noh ha ka rukom kaba dei sha shiliang ka wah Tawang chu ban ap ban ialeh ia ki shipai China ki ban wan tur hadien ba

la pynduh noh ia ka jingkieng halor ka wah  
Tawang chu ha ka lynti na Tawang sha Sela  
Pass.

Ki Rangbah shipai India kila ia pyrkhath  
la kane ka jaka ka long kaba bit ban  
ialeh pyrshah ia ki shipai China ne ban  
wad da kawei pat ka jaka kaba kham bha.  
Ha ka jingialang ki khlieh duh ba Delhi bad  
u Nehru, don kiba ai jingmut ban pynkhreh  
ia ka jingialeh pyrshah ia ki shipai China ha  
Bomdila. Ki Rangbah shipai ba hakhlieh duh  
ki la jied ia ka Sela pass, ka jaka ha kaba  
vn pynkhreh ka jingiada kaba skhem tad  
kaba khlañ ban ialeh ia kano kano ka jing-  
wan tur ki shipai China. Hañen, kat kum ka  
jingai jingmut bad ka jingthuru ki rangbah  
shipai kaba skhem, u Nehru u la rai ba dei  
ban iada ia ka ri na ki shipai China hangne  
ha Sela pass.

Ka Sela ka long ka jaka kaba kynjang  
tam hagdeng ka Tawang bad ka Bomdila.  
Ka jngai kumba hwniewphew kilometre na  
Tawang bad shispah shiphew kilometre na  
Bomdila. Ka jaka ka jrong haduh khadsaw  
hajar phut shiteng na ka sla duriaw. U  
Lt. General Harbakh Singh uba la shimti ia ka  
Corp Command u la myijur ba kane ka jaka  
ka biang bha ban buh ki shipai, ki tup ki  
man bad ban pynkhreh ban ialeh pyrshah ia  
ki shipai China kiba la nang wan tur na  
Tawang. U ong ba ia kawei ka kynhun Bri-  
gade, lada pyndonkam ia ka ha ka rukom kaba

dei, yn ym lah ban pynkhih nangne da kano kano ka kynhun ki nongshun kaba heh haduh shiphew shah. Kan donkam haduh laiphew hajar ki shipai China ne lai division ban lah ban ialeh bad kata ruh kin nym lah ban pyndem hapoh u rangbah shipai uba stad bad uba shlor.

Ha Sela la pynap haduh san tylli ki battalion, kata, lai kynhun ki shipai Sikh, kawei ka kynhun shipai Garhwal bad kawei ka kynhun ki shipai Dogra. Baroh kine ki shipai ki long na ki jaid kiba shlor ban ialeh. La don ruh ka jingpynkhreh ia ki suloi ki tup kiba biang bad kumjuh ki jingsiat kiba biang. Ki shipai India ki la lah dep pynpoi ia ki tiar ki tar ialeh ha Sela. Kat kum ka jing-kheĩn na ka jingskhem ka jaka ialeh, kan long kaba eh wat ia ki laiphew hajar ki shipai China ban ialeh hangne. Pynban ki shipai India hangne ruh ki la hap ban shah jop da kaba jem ha ki shipai China.

U Brigadier Palit, uba tip bha ia kine ki jaka u la ai jingmut ban pynskhem bad pyn-khlaiĩ ia ki jaka na kiba ki shipai China ki lah ban wan tur kata na Sela, Tsela, Kiya La, Poslingla bad Bangazong. Ha kajuh ka por ki rangbah shipai ki la mynjur ban pyn-khlaiĩ ia ka kynhun shipai 4 Infantry Division bad ka Brigade kaba don san ki battalion ha Sela, kawei ka kynhun shipai Brigade ha Dirang bad kawei ka kynhun shipai Brigade ha Bomdila.

Katne ka long ka jingpynkbreh ban khang ia ki shipai China ban tur kham shapoh ka ri India. La buh ia u General A. S. Pathama kum u Commander jong ka kynhun shipai 4 Division ha ka jaka u General Naranjan Prasad.

U General Kaul u la shimti biang kum u Corps Commander ha ka arphewhyane tarik u October. Kane ka jingwan shimti biang u Kaul kum u Corps Commander ka la pyndiaw shibun, ym tang ia ki rangbah shipai hynrei ia ki kynhun shipai boroh kiba ym pat klet ia ka jingjia ha Tsengjong ha u October shiphew tarik bad ka jingphet jongu ha ka por ba ki China ki la sdang ban tur pyrshah ia ki shipai India ha Dhola. Ka jingai biang ia kane ka kam kum u Commander ka la long kaba bakla bad kaba la shu ai khlem pyrkhath, tang ban da ia uwei u Commander na ka jinglehraiñ. Toi, ia u Harbaksh Singh la dei ban nang pynneh kum u Commander. U Kaul hi un nym lah shuh ban pyndonkam hok ia la ka khlieh hadien ka jingshah jop ha ka thmz Namka chu. U hi u iohi ia ka bor ki shipai China bad u la don lypa ka jingsngew ba ym lah ban ialeh ia ki. Kane ka jingbym sngewshngaiñ jong u Kaul ka la par wat sha u A. S. Pathama u Commander ba thymmai ka 4 Division. U Pathama u la sdang ban don ka mynsiem kbñium. U Kaul u la pyrkhath ban wad jingiarap na ki ri kum ka America, Taiwan bad South Korea ban iatrei lang pyrshah ia ka China. U pyrkhath ba dei

ban ioh ki tiar kiba biang na America bad ban khot ia ki shipai bar ri ban ialeh ha NEFA.

Hadien ba ki shipai China ki la dep kaba shna ia ka surok Bumla-Tawang, ki shipai China ki la pynkhlañ ia la ki pyrton ban tur shaduh ka wah Tawang chu pyrshah ia ka Sela shaduh Poshing La. Ki shipai suiñ ki la iohi ia kane ka jingtur ki shipai China bad ki la aiktien ba ka don ka jingma ba ki shipai China ki lah ban wan beit sha Bomdila da kaba kiar ia ka Sela Pass.

Katkum ka jingkhelñ antad, ki China ki don ka kynhun shipai haduh ar Division ha Tawang, ar kynhun Brigade ha pyrshah ka Kibithoo, ar kynhun Brigade ha pyrshah Lola bad ar kynhun Brigade ha Gelling bad Tamadem. La ithuh ruh ba ki shipai China ki thmu ban ia id lyngba ia ka Bangazong bad Poshing La hynrei u Kaul u pyrkhath ba ki shipai China kin nym tur haduh Bomdila da kine ki lynti.

U Col. Chiranjit Lal u iathuh ba bun na kito ki shipai kiba la lat ban phet na Namka chu bad ki bym don ha kano kano ka kynhun shipai ki la iathuh ia ka bor bad jingkhlañ ki shipai China bad ki da pynheh artad. Kane ka la pynsyier bad pynsleptierg ia ki shipai kiba dang wan thymmai.

Ki shipai China ki la nang tur artet ia ka wah Tawang chu shaphang Poshing La hynrei u Kaul u iathuh ba um don ki shipai kiba biang ban

phah sha Poshing La. U Kaul hi u la kylla dur lypa namar u hi u tip ba ymlah ban khang ia ki shipai China ban nang tur namar um don shipai kiba biang. Ha kajuh ka por ki shipai lungrut ka China kiba dang sha wan naduh Sining ki la tur sha Sela hynrei ha ka jingialeh kaba jur ki la shah pynher krat ha ki shipai India ha Nuranang bad Jang, ki jaka ba kham sha kjat na Sela. Wat ha ka sien kaba ar, ki shipai China kim shym lah ban tur pyrshah ia ki shipai India. Ki shipai China ki la tur biang ryngkat bad ki shipai China kiba tur kawei hadien kawei na ka wah Tawang chu bad ki la shong ha ki jaka ba kham hajrong na kiba ki lah ban iohi ia kine ki lynti iaid lyngba ka Sela pass. Kane ka jngtur ki China ka la sdang naduh shuwa ka khadsan tarik u November. Ki shipai China ki dei ban ioh knieh ia ka Sela khnang ban pynpoi ia ki kali bad ia ki jingdonkam ki shipai jngki. Ha ka jingshisha ki la lah leit shaduh palat Sela na ki lum shaphang mihngi haduh ba ki shipai India jong ka 4 Garhwal ki la dei ban kynriah noh sha Sela. Hadien ka jingkynriah ki shipai Garhwal, la bud sa ka ka jingiehnoh ia la ki jaka ialeh da ki shipai ka Sikh Light Infantry bad sa bud sa kiwei kiwei ki shipai.

Ha kane ka por, u Pathama u la klumar khlieh bad u la kwah ban weng noh ia ka kynhun shipai Brigade na ki sharing ka Sela sha ka Headquarter jongu. U la ai hukum ia u Brigade Commander ban pyn kynriah noh ia ki shipai sha Dirang bad ba ki shipai

2 Rajput kin nang ap katba ki shipai ka Brigade ki nang kynriah. Ki don haduh san kynhun batallion ba la pynap ha ki sharing ka Sela bad kam long kaba jem, wat ha ka por suk pyrthei ban pynkynriah ia ki khlem da don ka rukom pynbeit ia ka jingpynkynriah kaba biang bad kane kan shim por bun sngi hynrei ym lah long ban shu kynriah mar-mar. Ka jingdon ki shipai China hajan bad ha ki jaka ap kiba biang, kan wallam ka jingkut kaba sniew ia ki shipai India.

U Brigade Commander ka Sela um treh ban kynriah namar u don ki jingpynkhreh kiba u lah ban ialeh haduh hynniew sugi. Hynrei ka jingkynriah ki kynhun 4 Garhwal na sha them ki lum Sela ka la pynsngewthuh bakla ia ki shipai India baroh ba la don ka hukum ban kynriah bad kumta ki la iakynriah klumar. U B.N. Mullick ha ka kot jongu u thoh ba laut tang ki shipai 4 Garhwal kiba la ialeh du chi khait pyrshah ia ki shipai China arsngei lynter, kiwei pat ki kynhun shipai kim shy a siat wat tang shi kuli ruh. Hadien kane, u Brigade Commander um lah leh ei ei shuh bad baroh san ki battallion ki la kynriah noh na ka surok Sela-Senge Jong haduh ba la khapngiah ka surok bad ki kynhun shipai ki la ia khleh jaktung. U Mullck u thoh ba ki shipai China kiba bud nadien ki la ioh ka lad ban kerkut ia ki shipai India ha Sengezong ringkat bad ka jingwan ki shipai China na Bangazong. Ki shipai China ki la siat katba mon. Ka la don sa tang ka jingphet klumar ki shipai India bad ha kane ka jingphet ki shipai India ki la shah siat kumba lelbein bad kito

kiba lait na ka jingshahsiat bad kiba phet sha khlaw ki la shu un da u phlang bad ka um bad bun ki la iap.

Katba ka paw na ka kot ba la thoh da u B. N. Mullick, ka la don ka jingklumar ka-ba kbraw ha ka jingphah shipai bad ki hukum ki bym shai ia ki kynhun shipai bad wat ki rangbah shipai kiba dei peit ia ki kynhun shipai jongki kim nang rai shuh ban shong ban ialeh ne ban kynriah. U thoh ba haba u Commander ka 4 Division u la phah ka khubor ban pan bor ba un pynkynriah ia ka kynhun shipai Brigade, u General Thapar bad u Sen kim treh ban ai hukum hynrei ki ap ia u Kaul uba la ai ka hukum ban bat ia ki jaka ha Sela katba dang lah ban bat bad ban sa kynriah hadien. Kum kane ka hukum ka long ka bym shai bad u Commander u la pynkynriah noh ia ka kynhun shipai ha ka khadhynriew tarik. Ka kynhun shipai 2 Rujput kabi la prah na Dirang ban ap ia ka kynhun shipai 02 Brigade ha Sengezong ka la wan phai noh sha Dirang hynrei ha Dirang ym don shipai shuh bad ki shipai China ki la ker kut bad siat ia ki. Nangta u Mullick u thoh ba ka kynhun shipai Brigade ha Bomdila kaba la ioh ka hukum ban ther ia ki China bad ban plie ia ka lynti Dirang khnang ba ki shipai India kin lah ban kynriah sha Bomdila, haba ka dang leit tang khyndiat mile na Bomdila, ki shipai China ki la siat ia ka bad ka la hap phai dien noh sha Bomdila. Haba ki shipai ki la poi ha Bomdila ki



la shem pynban ba ki shipai China ki la don ha ki jaka rieh jongki bad ki la shah siat ha ki. Kumjuh ruh ki shipai kiba kynriah sha Rupa bad Chako ki la shah ther ha ban da biang ha ki shipai China. Ha ka khadhyn-niew tarik ki shipai China ki la tur sha Rezang La bad ki shipai India hangto ki la shah siat lut.

Kumta hapoh sawsngi naduh ka khadhyn-riew tarik u November ki shipai China ki la sar lut ia ki shipai India ha Kameng Division bad ki la pynduh khoit ia ka kynhun shipai 4 Infantry Division kaba don haduh khadwei ki Battalion.

U Mankekar ha ka kot jongu u thoh ba u General Pathama hi u la kynnoh ba ka la don ka jingduh mynsiem jong ki shipai baroh naduh ba sdang ka jingialeh ha Tse La namar ki la don ka jingsngew ba la ai ia ki ka kam ka bym lah ban pyndep. Ia ki shipai la pynkhleh jaktung haduh ba kim don ka jingiasngewthuh jingmut ha ki rukom ialeh thma. Ym shym la pynbit ia ki ban ialeh ha kine ki jaka lumbah bad ym shym la pynbiang ia ki jingdonkam jongki. U General Pathama hi u ong ba ki shipai ki don ka jingpynkhreh ia ka bam ka ban dap tang hynriew sngi bad ki jingsiat ki ban biang tang lai sngi. U General Kaul u kynnoh ia u General Pathama ia ka jingshah jop ha Tse La. U ong ba u General Pathama u la klumar khlieh da kaba u hukum ia u Brigadier Ho-

shiara ban pynkynriah ia ka kynhun shipai Brigade jongu na Tse La sha Diranetzong khnang ba un ioh ka jingiada ialade. U ong ba i da u General Pathama un jin da la ialeh ia ki shipai China tang shisngi ruh, un jin da la lah ban pynpra ia ka kynhun shipai China bad ka Bomdila hi kan bym kyllon ba ki shipai China. U General Pathama hi dalade u ong ba kam long kaba shisha ba ki shipai China ki la wan da ka kynhun kaba heb. U ong ba ki shipai China ki wan ban tur ha Tse La tang shi kynhun Brigade pyrshah ia ka shi kynhun Brigade ki shipai India bad ki shipai India la ka jingstisha ki la don ka kabu kaba kham bha ha Tse La na ka liang ka bam ka dib bad ki tiar ialeh. U General Pathama hi u don ka jingbym iadei jingmut bad ki rangbah shipai kiba lham halor ia u. U ong kim sngewthuh ia ka rukom ialeh thma, kumno bad hangno dei ban kham pynjur ia ki shipai. U kynnoh ia u General Kaul u bym lah ban ai ka hukum kaba beit bad man ba u ai hukum, ka hukum kam long kaba shai. U ong ba ha ka khadhynniew tarik u October, u General Kaul kum u Corp Commander um don ha ka iaka ba u dei ban don ban ia kren shaphang ka jingialeh tad haduh janmiet. U General Pathama u len ba dei ma u uba la hukum ia u Brigadier Hoshiara Singh ban kynriah na Tse La hynrei u Kynnoh ba u Kaul hi u la ai hukum ia u ba u lah ban kynriah na Tse La.

Kat kum ka jingtl oh jong u Lt. Col. Saigal ym don ba pynsngap ia ka jingai jingmut jong u Brigadier Hoshiara Singh ba ka kynhun shipai ka la don ha kylleng ki jaka ba la pynkhreh ban ialeh bad ba kaba ba eh ka long ban ia ai reng ia ki shipai China lada ki nud ban tur. U thoh ba ki shipai India ha Sela ki la don ka jingpynkhreh ka jinghem bad ki jingsiat kiba biang ia ki shipai ban iakhua pyrshah ia ki shipai China haduh artaiw. Ha kajuh ka rukom la ai hukum ba ki shipai kin kynriah na Dirang Tzong. Imat man ka por ba la pynduh ia ki lai phah jingtip ne pdiang jingtip hpdeng ki rangbah shipai nongialam ha Headquarter bad ki rangbah shipai nongialam ha ka madan ialeh, ka la don tang ka jingklumar suda. Ki shipai India kiba la don ha ki jaka ba ki la pynkhreh ban ialeh kin jin da la lah ban beh ia ki shipai China kiba la wan ban ialeh naduh ki jaka jongki kiba haduh shispah sanphew kilometre bad laid da ka kjat lyngba ki riat jong ki lumbah ka Tibet bad Nefa. Pynban da khongpong, ki shipai China ki wan ban pyndem ia ki shipai India ha ki jaka jongki hi bad hadien ka jingpynkhreh ban ialeh ba la biang nadong shadong kum ha Tsela, ha Dirang Tzong bad ha Bomdila. U Lt. Col. Saigal u ong ba dei tang ka jingbym lah ban rai u Major General ha ka khadhynriew tarik u November bad ki rangbah shipai ba, hpdeng khyndiat kynta, ka India ka la duh haduh kumba arphew hajar square kilometre ki jaka ha Kameng Division.

U Lt. Col. Saigal u thoh ba ki rangbah shipai ha Kameng Division klm donka/n ban da tip ia ki rukom ialeh thma kiba thymmai ban ialeh pyrshah ia ki thma rit kum kine kiba ki ialeh ha Sela ne Bomdila. Ha ki por hyndai, u Shviaji, u nonialam ki shipai Maratha u la pyndonkam ia la ki buit ban buh ia ki shipai jongu ha ki jaka kiba biang ha kaba ki shipai jongu ki la lah ban ialeh ia ki kynhun shipai kiba heh jong u Siem Moghul. Lada ki rangbah shipai kin shu kymaw ia kane ka thma kaba la hikai ia ki ha ki skul pule jongki bad bud ia ki rukom ialeh u Shivaji, ia ka thma ha Nefa hapdong ka India bad ka China yn jin da la thoh da kumwei pat.

---

## **Ka Jingshah Jop ba Jahburom**

Ka thma Dhola bad ka jingshah pyndem ki shipai India ha Tawang, Jang, Sela, Dirang bad Bomdila ha Kameng (NEFA) ka la wanrah ka jingjah burom kaba khraw ia ka ri baroh kawei. Ki shipai India ha ka thma bah kaba ar ki la ioh ka jingiaroh na ki ri ka pyrthei baroh kawei ia ka jingstad ialeh thma bad ka jingshlur jongki. Ki la ialeh pyrshah ia ki shipai German ba runar ka Germany bad ia ki shipai Japan ha ki jaka bad ki ri kiba kim tip. Wat ha ki jaka kum ka Germany ki shipai India ki la pyni ia la ka jingtbit bad ka jingshlur. Katto katne na ki shipai rangbah ka India ki la ioh ki khunam bad la tip ia ki kum ki rangbah shipai kiba stad bad kiba shlur. Hynrei ha la ka ri lajong ngi la shah jop suk ha ki shipai China kiba wan tang kum ki kai khlaw.

Uwei u Rangbah shipai India haba u iakren bad u Dr. Radhakrishnan uba la leit peit ia ka Dirangtzong hadien ba ki shipai China ki la phaidien trai noh u la ong kumne, "Ki wan ha ing jongngi bad hadien ba ki la ai shithap, ki leit noh."

Katei ka jingong u Rangbah shipai India ka long kaba dei hynrei kumno ki shipai India ki la lah ban shah leh kumta lymda don ka daw ing kaba hap ha kane ka apot. Ki China kim shym wan kum ki nongtuh ne nongshohnoh. Ki

la ai dak kaba shai bad ka por ba ka India kan pynkhreh kaba biang. Hood shisha, haba la sdang ka thma ne ka jingialeh la dei ban ia pyndonkam ia ki buit ki sap katba don ban rapar sha ki jaka shong shipai khlem da don ba tip ne iohsngew. Ka shong pat ha kito kiba ap ktem ban husiar bha.

Haba pule ia ki jingthoh da ki nongthoh kiba bun kiba thoh shaphang ka jingwan hiar thma ki China, kiba bun ki kubur ba ka dei ka daw ing kaba la pynpoi ia ka ri sha kane ka jingjah burom. U Lt. Col. J R Saigal hi u thoh shai ba ka thma ha Kameng (NEFA) ha ka snem 1962 ka long ka thma kaba khlem ialeh. Kiwei pat ki jingthoh ki pyni ia ka jingbym iasngewthuh jingmut hapdeng ki nongialam ka ri, ki rangbah shipai, ki porman bad kito kiba peit ia ka jingsynshar ne pyniaid kam ha kine ki jaka. Wat hapdeng ki Rangbah shipai ruh ka don ka jingbym iasngewthuh jingmut ne ka jingbymiarnir jingmut ban leh ia kaba bha tam. Imat ka paw na ki kot ba la pynmib ba ka jingthung ia u Lt. Gen. Kaul ka la pynthut ia kiba bun.

U Maxwell ha ka kot jongu u thoh ba la ka miet khadphra tarik u October, u Kaul u la hukum na Delhi ba ar company ki shipai dei ban phah ban pyukhlaiñ ia ka jaka ap shipai ha Tsangle. Ia kane ka hukum la phah pateng da u General Prasad sha u Brigadier Dalvi. U Dalvi uba la iohi ia ka jingpynkhreh ki shipai China ia ka kynhun shipai shi Brigade ha Dhola, u pyrshah ia kane ka

hukum bad u Prasad u la pyntip ia kata sha u Kaul ha Delhi. U Kaul u la jubab ba dei ban phah shipai, kumba u la hukum, bran bran sha Tsangle bad lada u Dalvi bad ki rangbah shipai jongu ki pyrshah ia kane, kin shah pynshitom. Kane ka la pynlong wat ia u Dalvi ban byngem ban phet noh na ka kam namar um lah ban peit ia ka jingiapi ki shipai India ha Dhola.

Kane hi ka la ialam jingmut ba ym don ka jingiasngewthuh jingmut wat hagdeng ki rangbah shipai.

Kawei pat ka daw ka long ba ki rangbah shipai heh kiba don na shajngai ki pyrshang ban ai hukum pyrshah ia ka jingai jingmut ki rangbah shipai kiba don ha ki jaka ialeh. Toi, ki rangbah shipai kiba don ha ki jaka ialeh ki kham tip shibun namar ki iohi ia kaei kaba jia bad ki lah ban pyrshat ia kaei ka ban sa jia, da kaba peit bniah ia kiei kiei kumba ki long ne ki laid. Kumta ki mih bun ki jingbymhun bad ki jingsngewrem kiba ialam sha ka jingklumar ka rukom buh shipai bad ka rukom ialeh ha Dhola. Lym kumta, kumno ki rangbah shipai kum u Dalvi kin shah kem ha ki China, haba kiba bun ki lait lane kumno ba u Kaul un phet hagdeng ka jingialeh, la shu ong ba u pang. Wat lada ngi ngelt ba u pang, kumno u lah ban ai hukum na ka jingthiah pang na Delhi.

Sa kawei pat, ka jingkren jong u Nehru ha ki nongthoh kot khubor kaba la mih wat

ha ka radio ruh, kata ban bret ia ki China (throw them out) lane ban beh ia ki da ka bor, ka la pynbitar ia ka China kaba long ka ri kaba khraw bad kaba khlaif. Ka China ka ong ba wat ka America hi ruh kam lah ban bret ia ki da ka bor, kumno ba ka India ka nud ban ong ban bret ia ki. Dei kane kaba pynmong pynsat bad aibor ia ki shipai China ban tur pyrshah ban pyni ia ka bor ka jingkhlaif ka ri China jongki.

Wat la ka don ka jingdkoh ka rukom ialeh ne ka jingbymbiang ki tiar ialeh ne ki shipai ha Dhola, ka jaka kaba eh bad bym lah ban pynpoi shipai ne tiar kyrkieh katba dohkam bad ka jingialeh ka bym aifad ia ka India, ka India kan jin da la pynher krad ia ki shipai China na Tawang, Sela bad Bomdila—ki jaka kiba ka India ka la pynkhreh ki shipai kiba biang, ki jaka rieh kiba biang, ka bam kaba biang, ki tiar ialeh kiba biang kum ki machine gun bad ki tank. Pynban wat hangne ruh ka don ka jingartatien bad ka jingbym iasngewthuh jingmut. Hapoh ka jingialam jong u Brigadier Hoshlar Singh la pynher krad haduh saw sien ia ki China kiba pyrshang ban tur ha Sela ha u November khadhynniew tarik ka snem shihajar khyndai spah hynriew phewar bad ki China ki la jan shah jop. Hynrei kyndit kyndit la poi ka hukum na u Mojor General Pathama ba u Brigadier Hoshlar Singh bad ki shipai India kin mih noh na ki kut ialeh bad kynran dlen noh. Kumta ki shipai India kiba kwah ban ialeh da ka jingshiur kim loh lad ban la aireng



bad ki shipai China ha ka rukom kaba dei. Ka  
 jingphah ia ki hukum ia ki shipai ban kynriah  
 na kawei ka jaka sha kawel ka la pynlam-  
 wir ia ki bad bun ki shipai ki la shu shah  
 siat iap bad bun kiba iapthngan bad iap  
 khriat—kito kiba lait na ki kuli ding jongki  
 shipai China.

---



## **Ka Jingdon ki Shipai kat kum ki kyi shipai bapher bapher**

1.	Shi Division	---	Hapdeng 17,000 19,000 ngut.
2.	Shi Brigade	---	Hapdeng 3000 4000 ngut.
3.	Shi Battallion	....	950 ngut.
4.	Shi Company	...	125 ngut
5.	Shi Platoon	...	40 ngut
6.	Shi Section	...	11 ngut.

## **Ki Rangbah Shipai ba dei peit ia kitei kynhun Shipai**

1.	Division	...	U Major General
2.	Brigade	....	U Brigadier.
3.	Battalion	---	U Lt Colonel.
4.	Company	...	U Major.
5.	Platoon	...	U Subedar
6.	Section	---	U Havildar.

U Hehduh ki shipai .. U General.  
ne u Chief of the  
Army Staff.

U Army Commander ... U Lt General.

U Corp Commander ... U Lt. General.



## Ka Jingdon ki Shipai kat kum ki kynhun shipai bapher bapher

1.	Shi Division	---	Hapdeng 17,000 bad 19,000 ngut.
2.	Shi Brigade	---	Hapdeng 3000 bad 4000 ngut.
3.	Shi Battallion	....	950 ngut.
4.	Shi Company	...	125 ngut
5.	Shi Platoon	...	40 ngut.
6.	Shi Section	...	11 ngut.

## Ki Rangbah Shipai ba dei peit ia kitei ki kynhun Shipai

1.	Division	...	U Major General.
2.	Brigade	....	U Brigadier.
3.	Battalion	---	U Lt Colonel.
4.	Company	...	U Major.
5.	Platoon	...	U Subedar.
6.	Section	---	U Havildar.

U Hehduh ki shipai ... U General.  
ne u Chief of the  
Army Staff.

U Army Commander ... U Lt General.

U Corp Commander ... U Lt. General.